

Tawureta Munsa

Lewi serɛɛdubɛ bɔnsɔɛ xa Seriye

Masen yi kitaabui xa fe ra

Alatala naxa a xa seriye masen a xa pama be Annabi Munsa saabui ra. Na seriye sebexi kitaabui suuli kui naxee birin nalanxi xili falama «Tawureta Munsa.» Isirayila fɔlɔxi ki naxe nun e biraxi seriye naxan fɔxɔ ra, na birin sebexi na kitaabuie nan kui.

«Lewi, Serɛɛdubɛ bɔnsɔɛ xa Seriye» findixi kitaabui saxan nde nan na Tawureta Munsa kui. A sebexi mixie nan be naxee nu Ala xa wali rabama Isirayilakae ya ma. Na mixie findixi Lewi bɔnsɔɛ nan na. Lewi nu findixi Annabi Yaxuba xa di nde nan na. Ala nu bara yaamari fi a Lewi xa die xa findi salide walikɛe nun serɛɛdubɛe ra.

A nu lanma Ala xa wali xa raba a raba ki ma. Na kui Annabi Munsa naxa na birin seɛbe kitaabui kui alako diine yareratɛe nun Isirayila pama xa na seriye kolon, e xa bira na fɔxɔ ra. Fe gbegbe sebexi yi kitaabui kui serɛɛɛ xa fe ra. Ala nu wama nee xa ba e ba ki ma. A man naxa wa adama xa jere seniyeanyi kui, alɔ Ala nu wama a xɔn ma ki naxe a xa pama be. A yaamari wuyaxi fixi ne alako adama xa Ala waxɔnfe kolon.

To mixie nɔma lonni gbegbe tode yi kitaabui kui. Won xa a kolon Alatala mu yaamarie fixi mixie ma fufɛfu. Xa Ala bara seriye nde so adama yi ra, a na rabaxi fe nde nan ma. Ala wama a xa mixie xa seniyeen barima a a kolon e heeri nan toma na kira seniyeenxi xɔn ma. Xa won bira Ala xa marasi fɔxɔ ra, won fe fanyi sɔtɔma ne dunɔja, won man a sɔtɔ aligiyama. Ala xa won mali alako janige xa lu won bɔɛe kui, won xa dunɔja igiri alɔ won Daa Marigi won nasixi ki naxe. Amina.

Tawureta Munsa

Lewi serɛɛdubɛ bɔnsɔɛ xa Seriye

1

Serɛɛɛ gan daaxi

¹ Alatala naxa Annabi Munsa xili a xa hɔrɔmɔlingira kui, a a masen a be, ² «A fala Isirayilakae be, naxan na wa serɛɛɛ bafe n tan Alatala be, a xa xuruse lanma xa na mu a ra xuruse xungbe ba. ³ Xa a wama xuruse xungbe nan bafe serɛɛɛ gan daaxi ra, fo a xa

findi tuura ra lanyuru mu na naxan ma. A xa fa na ra n tan Alatala xa hōrōmōlingira sode dē ra, alako n xa a tongo. ⁴ Serēxeba xa a bēlēxē sa xuruse xun tagi, alako n tan Alatala xa na serēxē tongo, a xa findi a xunsare ra a xa yunubi xa fē ra. ⁵ Na tuura xa faxa n tan Alatala ya i. Haruna xa di serēxēdubēē xa fa na tuura wuli ra, e xa a kasan serēxebade sētie ma, serēxebade naxan na n ma hōrōmōlingira sode dē ra. ⁶ E xa tuura bura, e fa a isegē. ⁷ Haruna xa di serēxēdubēē xa yege radōxō, e tē radexē. ⁸ E man xa serēxē sube, a xunyi, nun a ture sa tē i serēxebade. ⁹ A furingē nun a sanyie xa raxa. Serēxēdubē xa na birin gan serēxebade. Serēxē gan daaxi na a ra naxan xiri rafan n tan Alatala ma.»

¹⁰ «Xa mixi wama serēxē gan daaxi bafe xuruse lanma ra, a xa findi yēxēē kontonyi ra, xa na mu a ra sikōtē, lanyuru mu na naxan ma. ¹¹ Serēxeba xa na kōn naxaba serēxebade kōōla mabiri n tan Alatala ya i. Haruna xa di serēxēdubēē xa a wuli tongo, e xa a kasan serēxebade sētie ma. ¹² E na gē sube ixabade, serēxēdubē xa a sube, a xunyi, nun a ture sa tē serēxebade fari. ¹³ Serēxeba xa serēxē furingē nun a sanyie raxa. Serēxēdubē xa na birin gan serēxebade. Serēxē gan daaxi na a ra naxan xiri rafan n tan Alatala ma.»

¹⁴ «Xa a wama xōni bafe serēxē gan daaxi ra n tan Alatala bē, fo a xa findi kolokonde nan na, xa na mu a ra ganbē yōrē ra. ¹⁵ Serēxēdubē xa fa a ra serēxebade, a a xunyi bolon a dē i, a a sa tē, a a gan. A wuli xa ifili serēxebade sētie ma. ¹⁶ A xa a gēme bōōtō ba, a a wōlē tē i xube xun, serēxebade sogetede mabiri ra. ¹⁷ Serēxēdubē xa a suxu a gabutenyie ma, a a ibōō. A xa a gan, a findi serēxē gan daaxi ra, naxan xiri rafan n tan Alatala ma.»

2

Sansi xōri serēxē

¹ «Xa mixi wama serēxē bafe n tan Alatala bē naxan findixi sansi xōri ra, a xa a luxuta a fanyī ra. A xa ture sa a fari, a surayī fan sa ture fari. ² A xa na so Haruna xa di serēxēdubēē yī ra. Serēxēdubē nde xa sansi xōri luxutaxi bēlēxē ya keren kō, ture saxi naxan fari, a nun surayī, a xa a sa tē i. Na xa gan n tan Alatala bē, a xa findi tōnxuma ra na serēxē birin xa fē ra. Serēxē na a ra naxan xiri rafan n tan Alatala ma. ³ Sansi xōri luxutaxi naxan luxi naa findima Haruna nun a xa die nan gbe ra. A seniyeen barima a baxi serēxē ganxi nan na naxan baxi n tan Alatala bē.»

⁴ «Xa mixi wama serexe bafe n tan Alatala be naxan findixi taami ganxi ra, a xa na yailan sansi xori luxutaxi ra lebini mu na naxan xun. Ture xa masunbu na fan na. Taami lebinitare xunxurie fan noma yailande, ture masoxi naxee ma.»

⁵ «Xa mixi wama serexe bafe naxan findixi taami gilixi ra, a xa na yailan sansi xori luxutaxi ra lebini mu na naxan xun. Ture xa masunbu na fan na. ⁶ A na ge gilinde, a xa igira, ture sa a ma, a xa findi serexe ra.»

⁷ «Xa mixi wama serexe bafe naxan findixi taami ra naxan ganxi tunde kui, a xa na yailan sansi xori luxutaxi nun ture ra. ⁸ A lanma mixi xa fa na serexe mooli ra n tan Alatala be. Xa na bara so serexedube yi ra, a na xaninma serexebade. ⁹ A xa nde tongo naxan findima tonxuma ra, a xa na gan serexebade fari, a xa findi serexe ra, naxan xiri rafan n tan Alatala ma. ¹⁰ Sansi xori dinxi naxan luxi a findima Haruna nun a xa die nan gbe ra. A seniyen barima a baxi serexe ganxi nan na naxan baxi n tan Alatala be.»

¹¹ «Serexe naxan birin bama n tan Alatala be, lebini yo naxa lu a xun. A mu lan wo xa serexe gan daaxi yo ba n tan Alatala be lebini na naxan xun, xa na mu a ra kumi. ¹² Wo noma lebini nun kumi sade sansi bogi singee xun ma naxee bama serexe ra n tan Alatala be, konɔ e naxa gan serexebade fari. ¹³ Foxɔe xa sa na serexe mooli birin ma, barima na bara findi saate tonxuma ra wo tan nun wo Marigi Ala tagi. Foxɔe xa sa wo xa serexe birin ma.»

¹⁴ «Xa wo wama serexe bafe n tan Alatala be wo xa sansi bogi singe ra, wo xa tonsɔe neene gan, ¹⁵ wo ture nun surayi sa a xun, a xa findi sansi bogi singe serexe ra. ¹⁶ Serexedube xa nde tongo na sansi xori, ture, nun surayi ra, na xa findi tonxuma ra. A xa na gan serexebade fari. A xa findi serexe ra, naxan xiri rafan n tan Alatala ma.»

3

Xanunteya serexe

¹ «Xa mixi wama xuruse xungbe bafe xanunteya serexe ra n tan Alatala be, xuruse xemema, xa na mu a ra ginema, a xa findi xuruse ra lanyuru yo mu na naxan ma. ² A xa a belexe sa na xuruse xun tagi n tan Ala xa hɔrɔmɔlingira sode de ra, a a kon naxaba. Haruna xa di serexedubee xa na xuruse wuli kasan serexebade seetie ma. ³ Xanunteya serexe kui, a lanma ture naxan na furinge seeti ma, a xa gan te i n tan Alatala ya i, ⁴ a nun a gungui firinyi, e ture, nun laare naxan na a boɲe ma. ⁵ Haruna xa die xa na birin gan serexe gan daaxi xun ma, naxan na ganfe serexebade fari. A xa findi se xiri ɲoxunme

ra n tan Alatala be.»

⁶ «Xa mixi wama xuruse lanma bafe xanunteya serexe ra n tan Alatala be, xuruse xemema, xa na mu a ra ginema, a xa findi xuruse ra lanyuru yo mu na naxan ma. ⁷ Xa mixi wama yexee bafe serexe ra, a xa na masen n tan Alatala be. ⁸ A xa a belexe sa a xun tagi, a fa a kon naxaba n tan Ala xa horomolingira sode de ra. Haruna xa di serexedubee xa na xuruse wuli kasan serexebade seetie ma. ⁹ Yi xanunteya serexe kui, a lanma a ture, a xuli, ture naxan na furinge seeti ma, ¹⁰ a gungui firinyi, e ture, nun laare naxan na a bope ma, na birin xa gan te i n tan Alatala ya i. ¹¹ Serexedube xa na gan serexebade fari. Te xa na birin gan. Na bara findi serexe gan daaxi ra n tan Alatala be.»

¹² «Xa mixi wama si bafe serexe ra, a xa na masen n tan Alatala be. ¹³ A xa a belexe sa a xun tagi, a fa a kon naxaba n tan Ala xa horomolingira sode de ra, Haruna xa di serexedubee xa na xuruse wuli kasan serexebade seetie ma. ¹⁴ Yi xanunteya serexe kui, a lanma a ture naxan na furinge seeti ma, ¹⁵ a gungui firinyi, e ture, nun laare naxan na a bope ma, na birin xa gan te i n tan Alatala ya i. ¹⁶ Serexedube xa na gan serexebade fari. Te xa na birin gan. Na bara findi serexe gan daaxi ra n tan Alatala be naxan xiri rafan n ma.»

¹⁷ «Mixi yo naxa sube ture don, mixi yo naxa sube wuli min. Wo sabati dede, na bara findi yaamari ra naxan mu kanama abadan.»

4

Yunubi xafari serexe

¹ Alatala naxa a masen Annabi Munsa be, ² «A fala Isirayilakae be, xa mixi nde sa yunubi raba, kon a mu keli a janige ma, a xa bira yi seriye foxo ra. ³ Xa serexedube kuntigi sa Ala xa yaamari nde matandi, na fa findi yunubi ra pama be, a lanma a xa tuura ba serexe ra n tan Alatala be, lanyuru mu na naxan ma, alako na xa findi yunubi xafari serexe ra a be. ⁴ A xa tuura xanin n tan Ala xa horomolingira sode de ra n ya i, a a belexe sa a xun tagi, a fa a kon naxaba n tan Alatala ya i. ⁵ Serexedube kuntigi xa na tuura wuli xanin n ma horomolingira kui, ⁶ a a belexesole ragoro na wuli xora, a a kasan sanya solofere dugi ya ra naxan gbakuxi yire seniye nxi ma n tan Alatala ya i. ⁷ Serexedube xa wuli nde sa ferie ma naxee na surayi serexebade tunxunyi naani ra, naxan na n tan Alatala ya i n ma horomolingira kui. Wuli naxan luxi, a xa na ifili serexe gan daaxi serexebade lanbanyi ma, naxan na n tan Alatala xa horomolingira sode de ra. ⁸ A xa ture

birin ba tuura ma naxan findixi yunubi xafari serexe ra, ture naxan na a furinge seeti ma,⁹ a gungui firinyi, e ture, nun laare naxan na a boje ma.¹⁰ A xa na raba alo xanunteya serexe rabama ki naxe. Serexedube xa na gan serexe gan daaxi serexebade fari.¹¹ Kono tuura kiri, a sube, a xunyi, a sanyie, a furinge, nun a jape,¹² na tuura donxoe birin xa xanin jama yonkinde fari ma, yire seniye nxi, te xube wolema dennaxe. Menni a xa gan te ra na te xube fari.»

¹³ «Xa Isirayila jama birin nan sa n tan Ala xa yaamari nde matandixi, kono na mu keli e panige ma, na findima yunubi ra e be.¹⁴ E na fahaamui soto na ma temui naxe, jama xa tuura yore ba serexe ra n tan Alatala be horomolingira sode de ra naxan findima yunubi xafari serexe ra e be.¹⁵ Nama forie xa e belexe sa tuura xun tagi n tan Alatala ya i, e a kon naxaba.¹⁶ Serexedube kuntigi xa na tuura wuli xanin n tan Ala xa horomolingira kui,¹⁷ a a belexesole ragoro na wuli xora, a a kasan sanya solofere dugi ya ra naxan gbakuxi yire seniye nxi ma n tan Alatala ya i.¹⁸ Serexedube xa wuli nde sa ferie ma naxee nu na serexebade tunxunyi naani ra, naxan na n tan Alatala ya i n ma horomolingira kui. Wuli naxan luxi, a xa na ifili serexe gan daaxi serexebade lanbanyi ma, naxan na n ma xa horomolingira sode de ra.¹⁹ A xa ture birin ba tuura ma, a na gan serexebade fari.²⁰ A xa yi tuura ba serexe ra alo naxan bama yunubi xafari serexe ra. E ba ki birin keren. Na kui, serexedube serexe bama naxan findima e xunsare ra, alako e xa yunubie xa xafari.²¹ A xa na tuura xanin jama yonkinde fari ma, a xa a gan alo boore tuura ganma ki naxe. Na findima yunubi xafari serexe nan na jama be.»

²² «Xa mange nde a Marigi Alatala xa yaamari nde matandi, kono na mu keli a panige ma, na findima yunubi ra a be.²³ A na fahaamui soto na ma temui naxe, a xa sikote ba serexe ra, lanyuru mu na naxan ma.²⁴ A xa a belexe sa sikote xun tagi ma n tan Alatala ya i, a a kon naxaba serexe gan daaxie kon naxabama dennaxe. Yunubi xafari serexe na a ra.²⁵ Serexedube xa a belexesole ragoro na wuli xora naxan baxi yunubi xa fe ra, a nde sa ferie ma naxee na serexe gan daaxi serexebade tunxunyi naani ra. Wuli naxan luxi, a xa na ifili serexe gan daaxi serexebade lanbanyi ma.²⁶ A xa na ture birin gan serexebade fari, alo xanunteya serexe rabama ki naxe. Na kui serexedube xunsare serexe bama mange be, alako a xa yunubi xa xafari.»

²⁷ «Xa mixi nde sa a Marigi Alatala xa yaamari nde matandi, kono na mu keli a panige ma, na findima yunubi ra a be.²⁸ A na fahaamui soto na ma temui naxe, a xa si gine ba serexe ra, lanyuru mu na naxan ma, a xa yunubi xa fe ra.²⁹ A xa a belexe sa na

yunubi xafari serexe xun tagi, a a kon naxaba serexe gan daaxie kon naxabama dennaxe.³⁰ Serexedube xa a belexesole ragoro na wuli xorra naxan baxi yunubi xa fe ra, a nde sa ferie ma naxee na serexe gan daaxi serexebade tunxunyi naani ra. Wuli naxan luxi, a xa na ifili serexe gan daaxi serexebade lanbanyi ma.³¹ A xa na ture birin ba si ma, alo xanunteya serexe rabama ki naxe, a na gan serexebade fari, a xa findi se xiri joxunme ra n tan Alatala be. Na kui serexedube xunsare serexe bama na mixi be, alako a xa yunubi xa xafari.»

³² «Xa a yexee bama yunubi xafari serexe ra, fo a xa findi yexee ginema lanyuru mu na naxan ma.³³ A xa a belexe sa na yunubi xafari serexe xun tagi, a a kon naxaba serexe gan daaxie kon naxabama dennaxe.³⁴ Serexedube xa a belexesole ragoro na wuli xorra naxan baxi yunubi xa fe ra, a nde sa ferie ma naxee na serexe gan daaxi serexebade tunxunyi naani ra. Wuli naxan luxi, a xa na ifili serexe gan daaxi serexebade lanbanyi ma.³⁵ A xa na ture birin ba yexee ma, alo xanunteya serexe rabama ki naxe, a xa na gan serexee fari naxee ganma serexebade fari. Na kui serexedube xunsare serexe bama na mixi be, alako a xa yunubi xa xafari.»

5

Yunubi ndee nun e xa serexee

¹ «Xa mixi nde sa a me e seedee xilima kiiti nde ma, konɔ a gundi seedeyaxi fe naxan ma a mu na fala pama be, na yunubi luma a xun ma.² Xa mixi din se seniyentare ra a mu a kolon, alo sube raharamuxi binbi, xa na mu a ra xuruse seniyentare binbi, xa na mu a ra bubuse seniyentare binbi, na mixi fan findima ne mixi seniyentare ra, a yunubi soto na kui.³ Xa mixi nde sa din se seniyentare ra naxan kelixi adamadi fate ma, a fa li a mu a kolon na temui, xa a sa a kolon temui naxe, a findima seniyentare ra, a yunubi sotoma na kui.⁴ Xa mixi nde sa a kali fufafu, fe fanyi xa na mu a ra fe jaaxi ra, a fa neemu na ma, a na ratu na fe ma temui naxe, a findima seniyentare ra, a yunubi soto na kui.»

⁵ «Naxan na yunubi mooli rabama, a lanma a xa a ti na ra.⁶ A xa yexee gine, xa na mu a ra si gine ba yete ragbilen serexe ra n tan Alatala be. Na kui serexedube xunsare serexe bama a be, alako a xa yunubi xa xafari.»

⁷ «Xa feere mu na a yi ra na serexe xa fe ra, a xa kolokonde firin xa na mu a ra ganbe firin ba serexe ra n tan Alatala be. Keren xa findi yunubi xafari serexe ra, boore xa

findi serexe gan daaxi ra. ⁸ A xa e xanin serexedube xon, serexedube xa yunubi xafari serexe nan singe ba. A xa a konyi gira, konon a naxa a xunyi ba a de i. ⁹ A a wuli nde kasanma serexebade seeti ma, wuli naxan luxi, a na ifilima serexebade lanbanyi. Yunubi xafari serexe na a ra. ¹⁰ Serexedube xa na xoni firin nde ba serexe gan daaxi ra a raba ki ma. Na kui, serexedube xunsare serexe bama a be a xa yunubi rabaxi xa fe ra, alako a xa xafari.»

¹¹ «Xa feere mu na a yi ra kolokonde firin, xa na mu a ra ganbe firin sotofe ra, a xa sansi xori dinxi konbo ya keren nun a tagi ba yunubi xafari serexe ra. A naxa ture, xa na mu a ra surayi sa na fari de, barima yunubi xafari serexe na a ra. ¹² A xa na xanin serexedube xon ma, serexedube suxu keren ganma serexebade fari tonxuma ra. A na rabama serexee fari naxee ganma serexebade fari, barima yunubi xafari serexe na a ra. ¹³ Na kui serexedube xunsare serexe bama a be, alako a xa yunubi rabaxi xa xafari. Sansi xori dinxi naxan luxi a findima serexedube nan gbe ra.»

¹⁴ Alatala naxa a masen Annabi Munsa be, ¹⁵ «Xa mixi nde sa se nde tongo naxan findixi n tan Alatala gbe ra, konon a mu a kolon a na yunubi mooli rabaxi, a xa yexee kontonyi ba serexe ra n tan Alatala be a xa yunubi xa fe ra. A mu lanma lanyuru yo xa lu na yexee ma, a sare fan xa lan sare ma naxan nawalima horomolingira kui. ¹⁶ A xa na se tongoxi ragbilen serexedube ma, a man xa kobiri sa na fari. Na findima kobiri naxan na, a na se sare nan itaxunma dodox suuli ra, a fa dodox keren ba a ra, a na so serexedube yi ra. Na kui serexedube xunsare serexe bama a be sikote ra naxan findi yete ragbilen serexe ra, alako a xa yunubi xa xafari. ¹⁷ Mixi naxan yunubi rabama, a n tan Alatala xa yaamari nde matandi, hali a mu a kolon, na bara yunubi soto, fo a xa na sare fi. ¹⁸ A lanma a xa sikote ba yete ragbilen serexe ra, lanyuru mu na naxan ma, naxan sare lanma seriye ma. Na kui serexedube xunsare serexe bama a be a xa yunubi xa fe ra, a naxan nabaxi a mu a kolon, alako a xa yunubi xa xafari. ¹⁹ Na bara findi yete ragbilen serexe ra, barima a yunubi soto ne n tan Alatala ra.»

²⁰ Alatala naxa a masen Annabi Munsa be, ²¹ «Xa mixi nde sa yunubi soto, a fe paaxi raba n tan Alatala ra, alo a ngaxakerenyi madaxufe se nde xa fe ra, naxan nu bara taxu a ra, xa na mu a ra a naxan mupa, xa na mu a ra a naxan baxi a boore yi ra funmalaya ra, ²² xa na mu a ra se loxi a naxan toxi, a fa wule fala na xa fe ra kali ra, ²³ na yunubi raba mooli lanma a xa na se mupaxi ragbilen. Xa a mupaxi ne ba, xa a taxuxi ne a ra ba, xa se loxi na a ra a naxan toxi ba, ²⁴ xa se na a ra wule fala naxan ma fe ra

kali ra, a xa na ragbilen a kanyi ma keren na, a man xa kɔbiri sa na fari. Na findima kɔbiri naxan na, a na se sare nan itaxunma dɔxɔ suuli ra, a fa dɔxɔ keren ba a ra, a na so na kanyi yi ra. ²⁵ A man xa yexɛɛ kontonyi xanin serɛxɛdubɛ yire na yunubi xa fe ra a naxan nabaxi n tan Alatala ra. Fi yo naxa lu na yexɛɛ ma, a sare fan xa lan seriye ma. ²⁶ Na kui serɛxɛdubɛ xunsare serɛxɛ bama a bɛ n tan Alatala ya i, alako a xa yunubi, a naxan nabaxi, na xa xafari.»

6

Seriye serɛxɛdubɛɛ bɛ

Serɛxɛ gan daaxi seriye

¹ Alatala naxa a masen Annabi Munsa bɛ, ² «Yi yaamari so Haruna nun a xa die yi ra: Seriye nan ya serɛxɛ gan daaxi xa fe ra. Serɛxɛ gan daaxi xa lu serɛxɛbade fari kɔɛ ra, a xa gan han gɛɛsɛgɛ. ³ Serɛxɛdubɛ xa donma ragoro a ma, a xa wantanyi fiixe fanyi so a ra, a xa tɛ xube ba serɛxɛ gan daaxi bun ma, a a sa serɛxɛbade sɛɛti ma. ⁴ A na gɛ na wali ra, a xa a xa dugi fanyi ba a ma, a xa dugi gbete ragoro a ma, alako a xa na tɛ xube xanin jama yonkinde fari ma, yire seniye nxi. ⁵ Tɛ naxan dɛxɛxi serɛxɛbade bun ma, na naxa xuben. Gɛɛsɛgɛ birin serɛxɛdubɛ xa yege radɔxɔ, a xa tɛ xuru, a serɛxɛ gan daaxi sa na fari. A xanunteya serɛxɛɛ ture fan ganma naa nɛ. ⁶ Na tɛ dɛxɛma tɛmɛi birin serɛxɛbade bun ma, a mu xubenma.»

Sansi xɔri dinxi seriye

⁷ «Seriye nan ya sansi xɔri dinxi serɛxɛ xa fe ra. Haruna xa die xa fa na serɛxɛ ra serɛxɛbade n tan Alatala ya i. ⁸ Serɛxɛdubɛ xa suxu keren kɔ sansi xɔri dinxi ra, ture nun surayi naxan birin sama a fari, a xa na birin gan tɔnxuma ra serɛxɛbade fari. Na xiri rafan n tan Alatala ma. ⁹ Naxan luxi, Haruna nun a xa die xa na don a lɛbinitare ra, hɔrɔmɔlingira tɛtɛ seniye nxi kui. ¹⁰ A mu lanma a xa jin lɛbini ra, barima a fatanxi n ma serɛxɛ gan daaxie nan na naxɛɛ seniye nxi han alɔ yunubi xafari serɛxɛ nun yetɛ ragbilen serɛxɛ. ¹¹ Haruna xa di xɛmɛɛ nɔma na donde. Yaamari na a ra wo bɔnsɔɛ bɛ naxan mu kanama abadan. Mixi naxan birin a makɔrɛma na serɛxɛ gan daaxie ra naxɛɛ bama n tan Alatala bɛ, na kanyie seniye nxi nɛ.»

¹² Alatala naxa a masen Annabi Munsa bɛ, ¹³ «Haruna tima serɛxɛdubɛ kuntigi ra lɔxɔɛ naxɛ, a lanma a tan Haruna nun a xa die xa sansi xɔri fanyi dinxi konbo ya keren

ba serexe ra. Na serexe tagi bama geesege, boore tagi bama nunmare. Na mooli xa raba mixi tima serexedube kuntigi ra temui naxe. ¹⁴ Yi sansi xori dinxi xa gilin tunde kui, ture xa sa a ma. A na jon, a xuntunye xa sa te, a xa findi xiri joxunme ra Alatala be. ¹⁵ Serexedube naxan findima Haruna joxoe ra xa na serexe mooli ba. A xa raba na ki ne temui birin n tan Alatala ya i. Na serexe birin xa gan. ¹⁶ Serexedube xa serexe birin xa gan, e naxa na sese don.»

Yunubi xafari serexe seriye

¹⁷ Alatala naxa a masen Annabi Munsa be, ¹⁸ «Yi yaamari so Haruna nun a xa die yi ra: «Seriye nan ya yunubi xafari serexe xa fe ra. Yunubi xafari serexe kon naxabama serexe gan daaxi kon naxabade ne, barima se seniye nxi na a ra. ¹⁹ Serexedube naxan yunubi xafari serexe bama, a na donma n tan Ala xa horomolingira tete seniye nxi nan kui. ²⁰ Naxan yo dinma na serexe ra, na kanyi seniye nxi na. Xa na wuli sa kasan dugi nde ma, na dugi xa xa yire seniye nxi. ²¹ Xa na sube jinma tunde mooli nde kui naxan maniya feje ra, a na ge a jinde, na tunde xa kana. Xa a jinma tunde kui naxan yailanxi yoxui ra, na tunde xa maxa a fanyi ra ye ra. ²² Xeme serexedube birin xa na don, barima serexe seniye nxi na a ra. ²³ Konon mixi yo naxa yunubi xafari serexe don, naxan wuli xaninma horomolingira kui xunsare ra. Na serexe mooli xa gan te ra.» »

7

Yete ragbilen serexe seriye

¹ «Yete ragbilen serexe seriye nan ya: Serexe seniye nxi na a ra. ² Yete ragbilen serexe kon naxabama serexe gan daaxi kon naxabade ne. A wuli xa kasan serexebade seeti ma. ³ A ture birin, a xuli, a ture naxan na a furinge seeti ma, ⁴ a gungui firinyi, e ture, nun laare naxan na a boje ma, na birin xa ba serexe ra. ⁵ Serexedube xa na birin gan serexebade fari serexe gan daaxi ra Alatala be. Yete ragbilen serexe na a ra. ⁶ Xeme serexedubee nan na donma yire seniye nxi kui, barima serexe seniye nxi na a ra. ⁷ Yunubi xafari serexe nun yete ragbilen serexe, e seriye birin keren. Serexedube naxan na xunsare serexe baxi, a tan nan na sube donma. ⁸ Serexe gan daaxi kiri fan luma serexedube yi ra naxan na baxi serexe ra.»

⁹ «Sansi xori dinxi serexe naxan ganxi nun naxan gilinxi, e fan findima serexedube gbe ra, naxan e baxi serexe ra. ¹⁰ Sansi xori dinxi serexe naxan mu ganxi, ture gbansan nan saxi a ma, xa na mu a ra ture mu saxi a ma, nee findima Haruna xa di birin nan gbe

ra.»

Xanunteya serexe seriye

¹¹ «Xanunteya serexee seriye nan ya, naxan bama n tan Alatala be. ¹² Xa mixi nde wama tantui serexe bafe, a man xa taami lebinitaree yailan ture ra, a nun taami xunxurie ture saxi naxee ma, nun taami xunxuri naxee ramulanxi ture ra. ¹³ A na xanunteya serexe bama temui naxe, naxan findixi tantui serexe ra, a xa taami fan pin lebini na naxan xun. ¹⁴ Nde xa ba na taami mooli birin na, a findi serexedube gbe ra, naxan xanunteya serexe wuli kasanma serexebade seetie ma. ¹⁵ Na serexe sube donma a ba loxo ne, sese naxa lu han geesege.»

¹⁶ «Xa laayidi serexe bama, xa na mu a ra serexe janigexi, na sube xa don a ba loxo ne, konɔ xa nde sa lu a noma donde geesege fan. ¹⁷ Xa a donxo sa lu han na fan kuye iba, na sube xa gan gbiki na xi saxan nde loxo ma. ¹⁸ Xa mixi nde sa a yete xa serexe sube don na xi saxan nde loxo ma, Ala mu a xa serexe tongoma. A luma alo a mu serexe yo baxi, barima na sube findixi se seniyentare nan na. Mixi naxan na rabama, a yunubi sotoma na kui.»

¹⁹ «Serexe sube naxan dinma se seniyentare ra, a mu lanma na sube xa don. Fo a xa gan ne gbiki. Mixi seniyenxi nan noma na xanunteya serexe sube donde, ²⁰ konɔ seniyentare mu noma n tan Alatala xa xanunteya serexe donde, a raminita ne Isirayila pama ya ma. ²¹ Mixi naxan a belexe dinma se seniyentare ra naxan kelixi adamadi ma, xa na mu a ra a belexe din sube seniyentare ra, xa na mu a ra se gbete naxan mu seniyenxi, xa na kanyi fa n tan Alatala xa xanunteya serexe don, a raminita ne Isirayila pama ya ma.»

²² Alatala naxa a masen Annabi Munsa be, ²³ «A fala Isirayilakae be, «Wo naxa ninge, yexee, nun si ture don. ²⁴ Wo noma xuruse ture rawalide alo wo wama a xon ma ki naxe xa a faxe a yete ma, xa na mu a ra sube xaape nde naxa a faxe, konɔ wo mu noma a donde. ²⁵ Naxan yo ture donma, naxan noma rawalide serexe gan daaxi ra n tan Alatala be, na kanyi raminita ne Isirayila pama ya ma. ²⁶ Wo man mu lanma wo xa xoni wuli, xa na mu a ra xuruse wuli yo min yire birin wo na dennaxe. ²⁷ Naxan yo wuli minma, na kanyi raminita ne Isirayila pama ya ma.» »

²⁸ Alatala naxa a masen Annabi Munsa be, ²⁹ «A fala Isirayilakae be, «Naxan xanunteya serexe bama n tan Alatala be, a xa n tan Alatala gbe fi n ma. ³⁰ A xa na xuruse

ture nun a sisi xanin n tan Alatala yire alako a xa gan te ra n tan Alatala be. A lanma a xa na xuruse sisi lintan n tan Alatala ya i a masenfe ra n be, na findixi n tan nan gbe ra. ³¹ Serexedube xa na ture gan serexebade fari. Na xuruse kanke luma Haruna nun a xa die nan be. ³² Wo xa xanunteya serexee kui, wo man xa xuruse yirefanyi tabe fi serexedube ma. ³³ Xuruse yirefanyi tabe xa findi serexedube nan gbe ra naxan bara wuli nun ture ba xanunteya serexe ra. ³⁴ N bara nate tongo naxan mu kanama abadan, Isirayilakae xa xanunteya serexee kui, e xuruse kanke naxan lintanxi n tan Ala ya i, a nun xuruse yirefanyi tabe e naxan baxi, na birin xa findi serexedube Haruna nun a xa die gbe ra. ³⁵ Kabi Haruna nun a xa die findi n tan Ala xa serexedubee ra, e na nan sotoma n tan Alatala xa serexe gan daaxie ya ma. ³⁶ E to findi serexedubee ra, n tan Alatala naxa na yaamari fi Isirayilakae ma. Yaamari na a ra naxan mu kanama abadan.» »

³⁷ Seriyɛ nan na ki serexee xa fe ra, serexe gan daaxi, sansi xori dinxi serexe, yunubi xafari serexe, yete ragbilen serexe, serexedube ti serexe, nun xanunteya serexe. ³⁸ Alatala nu bara na birin masen Annabi Munsa be Sinayi geya fari a to Isirayilakae yamari e xa fa serexee ra Sinayi gbengberenyi ma.

8

Serexedubee doxo serexe

¹ Alatala naxa a masen Annabi Munsa be, ² «Haruna nun a xa die xili horomolingira sode de ra. I xa fa e xa dugi seniyenxie ra, a nun ture seniyenxi, tuura naxan bama yunubi xafari serexe ra, yexee kontonyi firin, nun debe, taami lebinitaree na naxan kui. ³ I xa Isirayila pama birin malan horomolingira sode de ra.» ⁴ Annabi Munsa naxa Alatala xa yaamari rakamali, pama fan naxa e malan horomolingira sode de ra.

⁵ Annabi Munsa naxa a fala pama be, «Alatala bara n yamari n xa yi raba.» ⁶ Annabi Munsa naxa Haruna nun a xa die maso, a naxa e maxa ye ra. ⁷ A naxa dugi seniyenxie ragoro Haruna ma, a naxa a tagi xiri beleti ra, a guba ragoro a ma, a serexedube donma ragoro na fari, a a tagi xiri beleti ra. ⁸ A naxa kanke makotose ragoro a kon ma, a geme firin sa na kui naxee findixi Ala waxonfe masense ra. ⁹ A naxa dugi mafilin Haruna xunyi ma, a tonxuma seniyenxi xee ma daaxi sa na ma, alo Alatala Munsa yamari ki naxe.

¹⁰ Annabi Munsa naxa ture seniyenxi tongo, a nde maso Ala xa horomolingira ma, nun se naxan birin na a kui. A nee raseniyen na ki ne. ¹¹ A naxa ture kasan serexebade

ma sanya solofere, a nun serexebade yirabasee, ye ragatade xungbe, nun na saxi se naxan fari, alako e xa seniye. ¹² A man naxa ture nde sa Haruna xunyi ma, alako Haruna fan xa seniye. ¹³ Annabi Munsa naxa Haruna xa die maso, a dugi seniye xie ragoro e fan ma. A naxa e tagi nun e xunyi xiri dugi ra, alɔ Alatala a yamarixi ki naxe.

¹⁴ Annabi Munsa to fa tuura yunubi xafari serexe ra, Haruna nun a xa die naxa e belexee sa na tuura xun tagi. ¹⁵ Annabi Munsa naxa a kon naxaba, a naxa a wuli nde tongo, a a maso serexebade ferie ma naxee nu na serexebade tunxunyi naani ra. A naxa na raba a belexesole ra, alako a xa serexebade raseniye. A naxa wuli donxoe ifili serexebade seetie ma. A serexebade raseniye na ki ne barima a findi xunsarade nan na. ¹⁶ Annabi Munsa man naxa ture tongo naxan nu na ninge furinge rabilinyi, a nun laare naxan nu na a boje fari, nun a gungui xori firinyie nun e ture. A naxa nee birin sa te i serexebade fari. ¹⁷ Konɔ a naxa tuura gundi, a kiri, a sube, nun a jape gan te ra jama yonkinde fari ma, alɔ Alatala a yamarixi ki naxe.

¹⁸ Annabi Munsa naxa fa yexee kontonyi ra naxan findi serexe gan daaxi ra. Haruna nun a xa die naxa e belexee sa na yexee xun tagi. ¹⁹ Annabi Munsa naxa a kon naxaba, a a wuli nde kasan serexebade seetie ma. ²⁰ A naxa yexee ixaba a xuntunyie ra. A naxa a xunyi, a xuntunyie, nun a ture gan te i. ²¹ A naxa yexee furinge nun a sanyie raxa, a yexee kontonyi gundi birin gan te ra serexebade fari serexe gan daaxi ra, naxan xiri rafan Alatala ma. A na birin naba ne alɔ Alatala a yamarixi ki naxe.

²² Annabi Munsa naxa yexee kontonyi firin nde tongo naxan findi serexedube donxoe serexe ra. Haruna nun a xa die naxa e belexee sa na yexee xun tagi. ²³ Annabi Munsa naxa a kon naxaba, a a wuli nde tongo, a a sa Haruna yirefanyi tuli ma, a yirefanyi belexekura ma, nun a sankura ma. ²⁴ A naxa Haruna xa die fan maso, a naxa wuli nde sa e yirefanyi tulie ma, e yirefanyi belexekura ma, nun e yirefanyi sankura ma. A naxa a wuli nde kasan serexebade seetie ma. ²⁵ A naxa na yexee ture tongo, a nun a xuli, a furinge ture, laare naxan na a boje fari, a gungui xori firinyie nun e ture, nun a yirefanyi tabe.

²⁶ Annabi Munsa naxa debe tongo taami lebinitaree na naxan kui, naxan nu donxoi Alatala ya i. A naxa taami lebinitare keren ba na, a nun taami keren naxan yailanxi ture ra, a nun taami lanmadi keren. A naxa e sa na yexee ture nun a yirefanyi tabe fari. ²⁷ A naxa na birin so Haruna nun a xa die yi ra, e fa na lintan Alatala ya i alako a xa a kolon a gbe na a ra. ²⁸ Na dangi xanbi, Annabi Munsa naxa e rasuxu e yi ra, a naxa e sa te

serexebade fari, serexe gan daaxi nu na dennaxe. Serexedube dɔxo serexe na a ra, naxan gan xiri rafan Alatala ma.

²⁹ Annabi Munsa naxa yexee kontonyi kanke tongo na serexedube dɔxo serexe ra, a fa na lintan Alatala ya i a masenfe ra a be. Na naxa findi Annabi Munsa gbe ra alo Alatala a yamarixi ki naxe.

³⁰ Annabi Munsa naxa ture seniyenxi nde tongo, a nun wuli nde naxan nu na serexebade fari, a naxa a kasan Haruna nun a xa dugie ma, a a kasan Haruna xa die nun e xa dugie fan ma, alako e tan nun e xa dugie birin xa seniyen.

³¹ Munsa naxa a fala Haruna nun a xa die be, «Wo sube jin hɔrɔmɔlingira sode de ra, wo xa a don menni, a nun taami naxan na debe kui naxan findi serexedube dɔxo serexe ra. N bara yaamari fi, Haruna nun a xa die xa na don. ³² Taami nun sube naxan luxi, wo xa na dɔnxɔe gan. ³³ Wo naxa keli hɔrɔmɔlingira sode de ra xi solofere bun ma, han wo xa dɔxɔe waxati kamalima temui naxe. ³⁴ Naxan nabaxi to, Alatala a yamarixi wo yunubi xunsare xa fe nan na. ³⁵ Na na a toxi, wo luma hɔrɔmɔlingira sode de ra xi solofere bun ma, kɔe nun yanyi, alo Alatala n yamarixi a ra ki naxe, alako wo naxa faxa.» ³⁶ Haruna nun a xa die naxa Alatala xa yaamari birin naba na ki a naxan masenxi e be Annabi Munsa saabui ra.

9

Serexedubee xa serexe singee

¹ Xi solomasaxan lɔxɔe, Annabi Munsa naxa Haruna nun a xa die, nun Isirayila forie xili. ² A naxa a masen Haruna be, «I xa serexe firin masen Alatala be, tuura di naxan findima yunubi xafari serexe ra, a nun yexee kontonyi naxan findima serexe gan daaxi ra, lanyuru mu na naxan ma. ³ I xa a fala Isirayilakae be, «Wo xa sikote keren ba yunubi xafari serexe ra. Wo xa tuura di nun yexee di naxee bara je keren soto, lanyuru mu na naxee ma, wo xa e ba serexe gan daaxi ra. ⁴ Wo xa tuura nun yexee kontonyi ba xanunteya serexe ra Alatala be. Wo xa taami fan ba serexe ra, ture sunbuxi naxan na. Wo xa na birin ba barima Alatala minima ne wo ma to.» »

⁵ Nama naxa serexee xanin hɔrɔmɔlingira sode de ra alo Annabi Munsa e yamarixi ki naxe. E birin naxa e makore hɔrɔmɔlingira ra, e ti Alatala ya i. ⁶ Annabi Munsa naxa a masen e be, «Wo xa Alatala xa yaamari rabatu alako a xa a nore masen wo be.»

⁷ Annabi Munsa naxa a masen Haruna be, «I maso serexebade ra. I xa yunubi

xafari serexe nun serexe gan daaxi ba xunsare ra i yete be, a nun jama be. I xa jama xa serexe fan ba e be xunsare ra alo Alatala a yamarixi ki naxe.»

⁸ Haruna to a maso serexebade ra, a naxa tuura di kon naxaba a yete yunubi xafari serexe ra. ⁹ A xa die naxa tuura wuli so a yi ra. A naxa a belexesole rasin wuli xora, a nde sa ferie ma naxee nu na serexebade tunxunyi naani ra. A naxa wuli donxe ifili serexebade lanbanyi ma. ¹⁰ Xuruse ture, a gunguie, nun laare naxan na a boje ma, a naxa na birin gan serexebade fari yunubi xafari serexe ra alo Alatala Annabi Munsa yamarixi a ra ki naxe. ¹¹ Konso a naxa a sube nun a kiri gan jama yonkinde fari ma.

¹² Na dangi xanbi, Haruna naxa serexe gan daaxi kon naxaba. A xa die naxa na wuli so a yi ra, a fa a kasan serexebade seetie ma. ¹³ E naxa serexe xuntunyie nun a xunyi so a yi ra, a na birin gan serexebade fari. ¹⁴ A to ge a furinge nun a sanyie raxade, a naxa e gan e nun serexe gan daaxi ra serexebade fari.

¹⁵ Haruna ge xanbi na ra, a naxa jama xa sikote kon naxaba, a xa findi yunubi xafari serexe ra jama be. A na raba ne alo a a singe raba ki naxe. ¹⁶ A naxa serexe gan daaxi ba a seriye ki ma. ¹⁷ A naxa sansi xori dinxi suxu keren gan serexebade fari serexe gan daaxi ba temui geesege. ¹⁸ A naxa tuura nun yexee kontonyi kon naxaba xanunteya serexe ra jama be. A xa die naxa na wuli so a yi, a a kasan serexebade seetie ma. ¹⁹ E naxa tuura nun yexee kontonyi ture tongo, naxan na e xuli nun e furinge mabiri, a nun e gunguie, a nun laare naxan na e boje ma, ²⁰ e naxa na birin sa sube kanke ma serexebade fari, e a birin gan. ²¹ Haruna naxa serexe subee kanke nun e yirefanyi tabe ite, a e lintan Alatala ya i a masenfe ra a be, alo Annabi Munsa a yamarixi ki naxe.

²² Haruna naxa a belexee itala, a duba jama be. A to yunubi xafari serexe, serexe gan daaxi, nun xanunteya serexe ba, a naxa goro kelifa serexebade seetie ma. ²³ Annabi Munsa nun Haruna naxa so horomolingira kui. E to mini, e naxa duba jama be. Na temui Alatala xa nore naxa mini jama ma. ²⁴ Alatala naxa te ragoro serexebade fari, a serexe gan daaxi nun ture gan. Nama to na to, e naxa e xui ite seewe ra, e e felen boxi ma.

10

Haruna xa di firinyie

¹ Haruna xa di firinyie, Nadabo nun Abihu naxa surayi gansee tongo, e te sa e kui, e surayi gan Alatala ya i. Konso e mu na te tongo Ala xa seriye ki ma. ² Na na a to, Alatala naxa te ragoro e ma, e faza a xa horomolingira yire seniyeenxi kui. ³ Annabi

Munsa naxa a fala Haruna be, «Alatala wo rakolonxi ne yi ra, a to a fala, «Naxee makore n na, e xa a kolon n seniyen, pama xa n binya.» » Haruna naxa dundu yen.

⁴ Annabi Munsa naxa Mikayeli nun Elisafan xili, Haruna baba xunya Yusiyele xa die. A naxa a fala e be, «Wo xa wo ngaxakerenyie furee xanin pama yonkinde fari ma, dennaxe makuya yire seniyenxi ra.» ⁵ E naxa e furee xanin pama yonkinde fari ma, alɔ Annabi Munsa e yamarixi ki naxe. E nu bara serexedube dugie lu e furee ma.

⁶ Annabi Munsa naxa a fala Haruna nun a xa die be, Eleyasari nun Itamari, «Wo naxa wo xunsexe rabepin, wo naxa wo xa dugie fan iboo. Wo naxa sese raba naxan noma sunnunyi masende yi mixie xa faxe xa fe ra, alako Alatala naxa xono pama ma, a wo fan faxa. Wo ngaxakerenyi Isirayilakae tan noma sunnunde yi mixie xa fe ra Alatala naxee faxaxi te ra. ⁷ Wo naxa keli Ala xa horomolingira sode de ra yi saxanyi, alako wo naxa faxa. Alatala xa mixi sugandixie nan wo tan na.» E naxa Annabi Munsa xa yaamari rabatu.

⁸ Alatala naxa a masen Haruna be, ⁹ «Wo na so horomolingira kui, wo naxa weni min. Wo naxa minse yo min naxan mixi siisima, xa na mu a ra wo faxama ne. Na seriye mu kanama wo bonsae be abadan. ¹⁰ Na nan a niyama wo noma Ala gbe nun adamadi gbe tagi rabade, seniyenyi nun seniyentarepa. ¹¹ Na fan a niyama ne wo xa no Isirayilakae xarande Alatala xa yaamarie ra, a naxee fixi e ma Annabi Munsa saabui ra.»

¹² Annabi Munsa naxa a fala Haruna nun a xa di donxoe be, Eleyasari nun Itamari, «Sansi xori dinxi naxan baxi serexe ra Alatala be, konɔ naxan birin mu ganxi te ra, wo xa na don serexebade fe ma. Wo naxa lebini sa a xun ma de, barima a seniyen. ¹³ Wo xa a don yire seniyenxi, barima a ganxi Alatala be serexe gan daaxie nan fe ma. Na findixi i gbe nun i xa die gbe nan na. Alatala serexedubee yamarixi na nan na. ¹⁴ Wo man xa serexe sube kanke nun tabe don yire seniyenxi ne, naxee bara lintan Ala ya i, a masenfe ra a be. Nee findixi wo gbe nan na, i tan, i xa di xeme, nun i xa di gin. Ala bara na yaamari fi Isirayilakae ma e xa xanunteya serexee xa fe ra. ¹⁵ Ture naxan ganma yo, tabe naxan bama yo, nun kanke naxan lintanma yo, e xa na birin masen Alatala be, na fa findi i gbe nun i xa die gbe ra, alɔ Alatala a yamarixi ki naxe. Seriye na a ra naxan mu kanama abadan.»

¹⁶ Annabi Munsa to sikote xa fe maxarin, naxan ba yunubi xafari serexe ra, a naxa a me a e nu bara a birin gan te ra, a naxa xono Eleyasari nun Itamari ma, Haruna xa die naxee mu faxa. A naxa a fala e be, ¹⁷ «Munfe ra wo mu yi serexe sube donxi yire

seniyenxi? Serexe seniyenxi na a ra Alatala naxan fixi wo ma, alako Isirayila jama xa yunubi xa xafari, a findi xunsare ra e be Alatala ya i. ¹⁸ Yi serexe wuli to mu soxi yire seniyenxi ma horomolingira kui, a nu lan ne wo xa a sube don yire seniyenxi ne, alɔ Ala n yamarixi a ra ki naxe.» ¹⁹ Haruna naxa Annabi Munsa yaabi, «To e bara e xa yunubi xafari serexe nun e xa serexe gan daaxi ba Alatala ya i, konɔ n to bara yi fe xɔrɔxɔe mooli soto, Alatala noma tinde n xa yunubi xafari serexe sube don to?» ²⁰ Annabi Munsa to na yaabi me, a naxa tin a ra.

11

Donse radaxaxi nun donse raharamuxi

¹ Alatala naxa a masen Annabi Munsa nun Haruna be, ² «Wo xa a fala Isirayilakae be, sube naxee radaxaxi wo be, nee nan ya: ³ Sube tore kanyie naxee tore itaxunxi firinyi ra, e man e xa donse ratema e de i e nu a idon. Wo noma na sube mooli donde.»

⁴ «Konɔ ndee na naxee donse ratema e de i e nu a idon, e tore tan mu itaxunxi firinyi ra. Nee raharamuxi wo ma. Nɔxome raharamuxi wo ma, barima a donse ratema a de i a nu a idon, konɔ a tore mu itaxunxi firinyi ra. ⁵ Yere maniyɛ nde fan donse ratema a de i a nu a idon, konɔ a tore mu itaxunxi firinyi ra. A raharamuxi wo ma. ⁶ Yere fan donse ratema a de i a nu a idon, konɔ a tore mu itaxunxi firinyi ra. A raharamuxi wo ma. ⁷ Xɔse tan, a tore itaxunxi firinyi ra, konɔ a mu donse ratema a de i a nu a idon. A raharamuxi wo ma. ⁸ Wo naxa na subee don, wo naxa din e binbie ra. E raharamuxi wo ma.»

⁹ «Yexe naxee na ye xɔra, wo noma naxee donde, nee nan ya: xale kanyi nun bele kanyi naxee na baa ma, xa na mu a ra xure kui. ¹⁰ Konɔ yexe naxee na baa ma, xa na mu a ra xure kui, bele mu na naxee ma, xa na mu a ra xale mu na naxee ma, e raharamuxi wo ma. ¹¹ E raharamuxi wo ma, wo naxa e sube don. E binbie fan raharamuxi wo ma. ¹² Yexe birin bele nun xale mu na naxee ma, e raharamuxi wo ma.»

¹³ «Xɔni raharamuxie nan ya wo mu lan wo xa naxee don: yube, sege, xaruma gbontɔe, ¹⁴ a nun nee maniyɛ birin. ¹⁵ Xaaxa fan, wo naxa na don a nun a maniyɛ birin. ¹⁶ Xundi, kofole, a nun tagarantongoe, ¹⁷ wo naxa e don a nun nee maniyɛ birin. ¹⁸ Gbongboe, yedɔnme, ¹⁹ laaba, tuke, a nun nee maniyɛ birin, wo naxa e don.»

²⁰ «Nimase gabutenyi nun sanyi na naxee ma, e raharamuxi wo ma. ²¹ Konɔ na nimase moolie ya ma, naxee tunganma, wo noma nee tan donde, ²² alɔ katoe, tugumie, nun

nee maniye birin. ²³ Kɔnɔ, nimase gabutenyi nun sanyi na naxee ma, e raharamuxi wo ma.»

²⁴ «Xa wo dinma sube seniyentare ra, wo findima mixi seniyentare ra han nunmare ra. ²⁵ Naxan e binbie maxaninma, na kanyi lan ne a xa a xa dugie xa, a man fa findi mixi seniyentare ra han nunmare ra. Fo a xa a xa dugie xa. ²⁶ Sube naxee birin tore mu itaxunxi firinyi ra, a nun naxee donse donma, kɔnɔ a mu gbilenma a rate ra e de i e nu a idon, nee raharamuxi wo ma. Naxan dinma na mooli ra a findima mixi seniyentare ra. ²⁷ Sube birin tore mu na naxee be, e e jere e sanyi naanie xun na, e raharamuxi wo ma. Naxan dinma e binbie ra na findima mixi seniyentare ra han nunmare ra. ²⁸ E raharamuxi wo ma. Naxan e binbie maxaninma, na kanyi lan ne a xa a xa dugie xa, a man fa findi mixi seniyentare ra han nunmare ra.»

²⁹ «Nimase naxan birin luma yilie kui, e haramuxi wo be. E xilie nan ya: bale, jene, kasa, ³⁰ bonbolika, koolo, nun nee maniye. ³¹ Na nimase xunxuri moolie raharamuxi wo ma. Naxan dinma e binbie ra a findima mixi seniyentare ra han nunmare ra. ³² Xa e binbie sa bira se nde fari, na fan findima se seniyentare ra, alo se sa se wuri daaxi, dugi, xuruse kiri xaraxi, beki, xa na mu a ra yirabase nde. A lanma na se mooli xa sa ye xɔɔra han nunmare ra alako a xa seniye. ³³ Xa na nimase mooli bira feje nde kui, feje nun a kui se birin findima se seniyentare ra. Na feje xa kana. ³⁴ Ye naxan nu na na feje kui, a na sa donse nde ma, na donse fan findima se seniyentare ra. Minse yo naxan nu na na feje kui, a fan findima se seniyentare ra. ³⁵ Xa na nimase mooli binbi bira se yo ma, na findima se seniyentare ra, alo taami ganse, xa na mu a ra tunde. E to findi se seniyentaree ra, a lanma wo xa e kana. ³⁶ Kɔnɔ xa e binbi sa bira dulonyi nan kui, xa na mu a ra ye ragatade nde, nee tan mu findima se seniyentaree ra. Kɔnɔ mixi naxan a belexe dinma e binbie ra, na findima mixi seniyentare ra. ³⁷ Xa a binbi bira sansi xori ma naxan sima, na mu findima se seniyentare ra. ³⁸ Kɔnɔ xa a binbi bira sansi xori tan ma naxan na ye xɔɔra, na sansi xori findima se seniyentare ra wo be.»

³⁹ «Xa xuruse radaxaxi nde faxa, mixi fa din a binbi ra, na kanyi findima seniyentare ra han nunmare ra. ⁴⁰ Naxan na a sube don, na kanyi lan ne a xa a xa dugie xa, a man fa findi seniyentare ra han nunmare ra. Naxan na sube binbi maxanin, na kanyi lan ne a xa a xa dugie xa, a man fa findi seniyentare ra han nunmare ra.»

⁴¹ «Nimase naxan birin a bubuma boxi ma, nee birin raharamuxi wo ma. A mu lanma wo xa nee don. ⁴² Bubusee nun nimase xunxuri naxee jere ma e sanyi naani xun

na, xa na mu a ra e sanyi wuyaxi xun na, e sese mu radaxaxi. Wo naxa e don. ⁴³
Wo naxa wo yete findi seniyentare ra na nimase mooli saabui ra. Wo naxa e don. ⁴⁴
Alatala nan n na, wo Marigi Ala. Wo xa wo yete fi n tan nan ma. Wo xa seniye, barima
n tan seniye. Wo naxa wo yete findi seniyentare ra na nimase xunxuri saabui ra naxee
luma jere ra boxi ma.»

⁴⁵ «N tan nan Alatala ra naxan wo ramixi Misira boxi ma, alako n xa findi wo
Marigi Ala ra. Wo xa seniye, barima n tan seniye. ⁴⁶ Seriyen nan na ki subee, xonie,
yexee, nun bubusee xa fe ra. ⁴⁷ Na kui wo noma sube seniye nxi nun sube seniyentare
tagi raba kolonde, sube radaxaxi nun sube raharamuxi.»

12

Dinge xa serexe

¹ Alatala naxa a masen Annabi Munsa be, ² «A fala Isirayilakae be, xa gine nde sa
teege, a di xeme bari, a findima seniyentare ra xi solofere bun ma, alo a kike walima
temui naxe. ³ Xi solomasaxan loxo, di xa sunna. ⁴ Na xi solofere xanbi, dinge luma
seniyentarepa kui xi tongo saxan nun saxan bun ma a wuli xa fe ra naxan minixi a ma a
di bari temui. A mu lanma a xa din se seniye nxi ra, a mu lanma a xa so yire seniye nxi
kui han maraseniye nyi waxati xa kamali.»

⁵ «Xa dinge di gine bari, a luma seniyentarepa kui loxo xun firin, alo a kike walima
temui naxe. Na xanbi a xa maraseniye nyi waxati buma xi tongo senni nun senni, a wuli
xa fe ra naxan minixi a di bari temui. ⁶ A xa maraseniye nyi waxati na kamali, di xeme,
xa na mu a ra di gine xa fe ra, a xa yexee je keren daaxi xanin serexedube xon ma
horomolingira sode de ra. A xa na ba serexe gan daaxi ra. A man xa kolokonde yore, xa
na mu a ra ganbe ba yunubi xafari serexe ra. ⁷ Serexedube xa na serexee ba Alatala be, a
findi na gine xa xunsare ra. Na temui a seniye nma ne na wuli xa fe ra. Seriyen nan na ki
gine be naxan di xeme barima, xa na mu a ra di gine. ⁸ Xa feere mu na a yi a xa yexee
soto, a noma ganbe firin xaninde, xa na mu a ra kolokonde firin. Keren xa ba serexe gan
daaxi ra, boore xa ba yunubi xafari serexe ra. Serexedube xa na ba, a findi xunsare ra
gine be, a fa seniye n.»

13

Furee mixi fate ma

¹ Alatala naxa a masen Annabi Munsa nun Haruna be, ² «Xa mixi fate kiri yire nde funtu, xa na mu a ra a fiixe, xa na mu a ra a findi fi ra, wo xa na kanyi xanin serexedube Haruna yire, xa na mu a ra a xa di nde yire. ³ Fure naxan na a fate, serexedube xa na mato. Xa fate xabe bara fiixe na fi yire, fi fan bara tilin, a sube li, fure jaaxi na a ra. Serexedube xa masenyi ti, na kanyi bara findi seniyentare ra. ⁴ Xa fure mu tilin, a na kiri nan gbansan fari, fate xabe mu fiixexi na longori, serexedube xa furema yamari a xa lu a kerenyi ma loxoɔun keren. ⁵ A xi solofere nde loxoɔe, serexedube man xa a mato. Xa a sa li fure mu na lantanfe a i, a man xa furema yamari a xa lu a kerenyi ma loxoɔun keren. ⁶ A xi solofere nde loxoɔe, serexedube man xa a mato a sanmaya firin nde. Xa fure jingi bara masara, a man mu lantanfe a i, serexedube xa masenyi ti, na kanyi bara seniye. Fure na a ra naxan mu jaaxu. A xa a xa dugie xa, a findi mixi seniyeɔi ra. ⁷ Koɔo xa serexedube bara a mato, fure bara lantan ye i na masenyi dangi xanbi, furema man xa gbilen serexedube yire temui gbete. ⁸ Serexedube man xa a mato. Xa fure bara lantan ye i, serexedube xa masenyi ti, na kanyi bara findi seniyentare ra, fure jaaxi na a ra.»

⁹ «Xa fure jaaxi bara lu mixi nde kiri ma, e xa a xanin serexedube yire. ¹⁰ A xa a mato. Xa na mixi kiri bara fiixe yire nde, a fa funtu, fate xabe fan fa fiixe na longori, a bula, sube mini kene ma, ¹¹ fure jaaxi na a ra naxan mu dandanma. Serexedube xa masenyi ti, na kanyi bara findi mixi seniyentare ra. Hali a mu lu a kerenyi ma waxati di bun ma soɔon, serexedube man xa a mato. Na tan bara ge findide mixi seniyentare ra. ¹² Xa serexedube bara a to a na fi jaaxi birin bara bari folo, naxan nu na furema fate ma, kelifa a sanyie ma han a xunyi, ¹³ a xa masenyi ti, na kanyi bara seniye, barima fi birin bara bari folo. A bara seniye. ¹⁴ Koɔo xa, fure sa bula, sube mini kene ma, na kanyi bara findi mixi seniyentare ra. ¹⁵ Serexedube na fure bulaxi to, a xa masenyi ti, fi bulaxi mu seniye, fure jaaxi na a ra. ¹⁶ Xa sube bulaxi fa bari, furema xa siga serexedube yire. ¹⁷ A xa a mato. Xa fure bara bari, serexedube xa masenyi ti, furema bara seniye. ¹⁸ Xa suuri mini mixi ma, a fa yalan, ¹⁹ koɔo na kiri fa fiixe, xa na mu a ra a gbeeli, na kanyi xa siga serexedube yire. ²⁰ A xa a mato. Xa fure bara tilin, a sube li, fate xabe bara fiixe na longori, serexedube xa masenyi ti, na kanyi bara findi mixi seniyentare ra. Fure jaaxi na a ra, naxan minixi suuri yire. ²¹ Xa serexedube mu fate xabe fiixe to, fi fan mu tilin, a mu sube lixi, a mu fiixe a gbe ra, furema xa lu a kerenyi ma loxoɔun keren. ²² Xa fure bara lantan ye i a fate ma, serexedube xa masenyi ti, na kanyi bara findi mixi seniyentare ra, fure jaaxi na a ra. ²³ Koɔo xa fure mu masaraxi a mu lantanxi a i, suuri barixi na a ra.

Serexedube xa masenyi ti, na kanyi mixi seniyenxi na a ra.»

²⁴ «Xa mixi fate bara gan te ra temui dangixi, a kiri fa bari, kono fure gbeeli, xa na mu a ra fure fiixe fa mini na longori, ²⁵ serexedube xa na mato. Xa furema fate xabe bara fiixe na longori, fure bara tilin, a sube li, fure jaaxi na a ra, naxan bara mini fate ma kiri nu ganxi dennaxe. Na serexedube xa masenyi ti, na kanyi bara findi mixi seniyentare ra, barima fure jaaxi na a ra. ²⁶ Kono xa serexedube mu fate xabe fiixe to fure ma, fi fan mu tilin, a mu sube lixi, a mu fiixe a gbe ra, serexedube xa na kanyi yamari a xa lu a kerenyi ma loxoxun keren. ²⁷ Serexedube xa a mato xi solofere nde loxo. Xa fure bara lantan ye i a fate ma, serexedube xa masenyi ti, na kanyi bara findi mixi seniyentare ra, fure jaaxi na a ra. ²⁸ Kono xa fure mu masaraxi, a mu lantanxi a i, a mu fiixe alo a singe, a fatanxi na kiri ganxi nan na. Serexedube xa masenyi ti, na kanyi mixi seniyenxi na a ra. Nari na a ra kiri gan dennaxe.»

²⁹ «Xa fure lu xeme, xa na mu a ra gine xunyi ma, xa na mu a ra a kenkenyi ma, ³⁰ serexedube xa na fure mato. Xa fi bara tilin, a sube li, fate xabe fiixe, a xurun, serexedube xa masenyi ti, na kanyi bara findi mixi seniyentare ra. Fure jaaxi na a ra naxan bara lu a xunyi ma, xa na mu a ra a kenkenyi ma. ³¹ Xa serexedube sa a to fure mu tilinfe, a mu sube life, fate xabe fooroxi mu na, a xa furema yamari a xa lu a kerenyi ma xi solofere bun ma. ³² Serexedube xa na fure mato xi solofere nde loxo. Xa fure mu lantanfe a i, fate xabe mu fiixe na longori, fi mu tilin, a mu sube lixi, ³³ na kanyi xa a xunsexe nun a dexabe bi a xa a ba a xa fi ra. Serexedube man xa furema yamari a xa lu a kerenyi ma loxoxun keren. ³⁴ Serexedube xa na fure man mato xi solofere nde loxo. Xa a mu lantanxi a i, a mu tilin, a mu sube lixi, serexedube xa masenyi ti, na kanyi mixi seniyenxi na a ra. A xa a xa dugie xa, a seniyen. ³⁵ Kono serexedube xa masenyi dangi xanbi, xa fure bara lantan ye i furema fate ma, ³⁶ serexedube man xa a mato. Xa fure bara lantan ye i, hali serexedube mu fate xabe fiixe fen. Na kanyi bara findi mixi seniyentare ra. ³⁷ Kono xa na fure mu lantanxi a i, fate xabe fooro nde tan bara mini, fure bara yalan. Na kanyi mixi seniyenxi na a ra. Serexedube xa masenyi ti, na kanyi mixi seniyenxi na a ra.»

³⁸ «Xa xeme, xa na mu a ra gine fate kiri bara fiixe yire ndee, ³⁹ serexedube xa na mato. Xa na mu fiixe a gbe ra, kasi mooli nde gbansan na a ra. A seniyen.»

⁴⁰ «Xa mixi nde xunsexe bara makon, telende kanyi na a ra, a mu jaaxu. Na kanyi seniyen. ⁴¹ Xa mixi nde xunsexe makonxi a tigi de biri gbansan ne, telende na a ra a mu

jaaxu. Na kanyi seniye. ⁴² Kono xa fure fiixe, xa na mu a ra fure gbeeli mini a xunyi ma, xa na mu a ra a tigi ma, fure jaaxi na a ra. ⁴³ Serexedube xa na mato. Xa na fure funtu naxan minixi a xunyi ma, a fiixe, xa na mu a ra a gbeeli alo fure jaaxi na ki naxe, ⁴⁴ furema na a ra, a mu seniye. Serexedube xa masenyi ti, na kanyi bara findi mixi seniye. Fure na a xunyi ma.»

⁴⁵ «Na fure jaaxi kanyi xa dugi ibooxi ragoro a ma, a xa a xunyi bi, a xa a de xabe makoto, a nu a fala a xui itexi ra <Seniyentare, Seniyentare.> ⁴⁶ Danmi na fure jaaxi na a ma, a mu seniye. Fo a xa lu a kerenyi ma jama yonkinde fari ma.»

⁴⁷ «Na fure jaaxi noma lude dugi ma naxan yailanxi xuruse xabe ra, xa na mu a ra gese fute ra. ⁴⁸ A man noma lude se nde denbexi ma naxan yailanxi xuruse xabe ra, xa na mu a ra gese fute ra. A man noma lude se nde ma naxan yailanxi xuruse kiri ra. ⁴⁹ Xa na fure bara ifooro, xa na mu a ra a bara gbeeli dugi ma, kiri ma, xa na mu a ra se denbexi ma, fure jaaxi na a ra. A xa masen serexedube be, a xa na mato. ⁵⁰ Na fure na se naxan ma, na se xa ragata yire nde a kerenyi ma xi solofere bun ma. ⁵¹ Xi solofere nde loxae serexedube man xa a mato. Xa na fure bara lantan ye i na dugi ma, xa na mu a ra na se denbexi ma, xa na mu a ra na kiri ma, fure jaaxi na a ra. Na bara findi se seniye. ⁵² Serexedube xa se birin gan na fure na se naxan ma, dugi naxan yailanxi xuruse xabe ra, dugi naxan yailanxi gese fute ra, dugi denbexi, xa na mu a ra kiri. ⁵³ Kono xa serexedube bara a mato, na fure mu lantanxi na see ma, ⁵⁴ a xa yaamari fi na see xa maxa ye ra, e xa sa e kerenyi ma xi solofere bun ma sanmaya firin nde. ⁵⁵ A na ge maxade, serexedube man xa na mato. Xa fure mu masaraxi, hali a man mu lantanxi a i, na findixi se seniye nan na. A birin xa gan te ra, hali fure na a lahale kerenyi gbansan nan ma. ⁵⁶ Xa serexedube bara a to fure mu fiixe alo singe, a xa na yire gbansan ba na. ⁵⁷ Kono xa fure na lantanfe a i dugi ma, xa na mu a ra dugi denbexi ma, xa na mu a ra kiri ma, fure jaaxi na a ra, fo na xa gan te ra. ⁵⁸ Xa fure bara ba dugi ma, xa na mu a ra dugi denbexi ma, xa na mu a ra kiri ma ye ra a firin nde, a bara seniye.»

⁵⁹ Seriyen nan na ki fure jaaxi xa fe ra naxan noma lude dugi nde ma naxan yailanxi xuruse xabe ra, xa na mu a ra gese fute ra, a nun dugi nde ma naxan denbexi, a nun kiri nde ma. Na seriyen noma a masende xa se nde seniye, xa na mu a mu seniye.

¹ Alatala naxa a masen Annabi Munsa be, ² «Maraseniyeanyi loxo, fure jaaxi kanyi xa siga serexedube xon. ³ Serexedube xa siga jama yonkinde fari ma na furema matode. Xa a bara yalan, ⁴ serexedube xa yaamari fi, a xa fa xoni jipe radaxaxi firin na, e nun sediri wuri, gere mooli nde, nun hisopi wuri furema be. ⁵ Serexedube xa yaamari fi, e xa xoni keren kon naxaba fepe nde xun ma, dulon ye na naxan kui. ⁶ A xa xoni jipe tongo, a nun sediri wuri, gere mooli nde, nun hisopi wuri, a xa e birin dukulu xoni wuli xora e naxan kon naxabaxi dulon ye xun ma. ⁷ A xa na kasan sanmaya solofere na furema ma, naxan lanma a xa seniyeen. Serexedube xa maseniye ti, na mixi bara findi mixi seniyeenxi ra. Na temui a xa xoni jipe bejin wula i.»

⁸ «Naxan wama seniyeenfe, a xa a xa dugie xa, a xa a fate maxabe bi, a xa a maxa ye ra. Na kui, a seniyeenma ne. Na dangi xanbi a noma sode jama yonkinde kui, kon a mu noma sode a xa kiri banxi tan kui xi solofere. ⁹ Xi solofere nde loxo, a man xa a xunsexe bi, a de xabe, a ya xinbi xabe, a nun a fate maxabe birin. A man xa a xa dugie xa, a xa a fate maxa. Na kui, a seniyeenma ne. ¹⁰ Xi solomasaxan nde loxo, a xa yexeyore xemema firin tongo, a nun yexee ginema, je keren daaxi, lanyuru mu na naxee ma. A man xa sansi xori dinxi konbo ya keren nun a tagi soto, ture masunbuxi naxan na, a nun ture sigaati ya keren. ¹¹ Serexedube xa furema nun a xa serexe ti n tan Alatala ya i horomolingira sode de ra. ¹² A xa yexeyore keren tongo, a xa a ba yete ragbilen serexe ra, a nun ture sigaati ya keren. A xa nee lintan n tan Alatala ya i. ¹³ A xa na yexee kon naxaba yire seniyeenxi yunubi xafari serexe nun serexe gan daaxi bama dennaxe. Serexedube nan gbe yete ragbilen serexe nun yunubi xafari serexe ra. Serexe seniyeenxi nan e ra. ¹⁴ Serexedube xa yete ragbilen serexe wuli nde tongo, a xa a sa furema yirefanyi tuli ma, a belexekura yirefanyi ma, nun a sankura yirefanyi ma. ¹⁵ A man xa na ture sigaati ya keren ifili a yete koola belexe kui. ¹⁶ A xa a belexesole yirefanyi sin ture kui, a nu bara naxan sa a koola belexe kui, a xa na ture kasan doxo solofere n tan Alatala ya i. ¹⁷ Ture naxan luxi serexedube belexe kui, a xa nde sa furema yirefanyi tuli ma, a nun a belexekura yirefanyi ma, a nun a sankura yirefanyi ma yete ragbilen serexe wuli fari. ¹⁸ Ture donxo naxan luxi serexedube yi ra, a xa na sa furema xunyi ma. Serexedube xa a xun sara n tan Alatala ya i. ¹⁹ Serexedube xa yunubi xafari serexe ba, a xa a xun sara a xa seniyeentareja ma. Na dangi xanbi a xa na serexe gan daaxi kon naxaba. ²⁰ A xa serexe gan daaxi nun sansi xori dinxi serexe ba serexebade fari. A xa furema xun sara alako a xa seniyeen.»

²¹ «Xa setare nan na furema ra, fēere mu na a yi na serexe xa fe ra, a xa yexeyore keren gbansan ba yete ragbilen serexe ra, naxan lintanma n tan Alatala ya i a xa findi furema xa xunsare ra. A xa sansi xori dinxi konbo ya tagi soto, ture masunbuxi naxan na, a nun ture sigaati ya keren, ²² nun ganbe firin, xa na mu a ra kolokonde yore firin. Keren xa findi yunubi xafari serexe ra, boore serexe gan daaxi. ²³ Xi solomasaxan nde loxo, a xa fa na serexee ra serexedube xon hromolingira sode de ra n tan Alatala ya i, alako a xa seniye. ²⁴ Serexedube xa yete ragbilen serexe yexee nun ture sigaati ya keren lintan n tan Alatala ya i. ²⁵ A xa na yexeyore kon naxaba yete ragbilen serexe ra. A xa a wuli nde tongo, a xa na sa furema yirefanyi tuli ma, a yirefanyi belexekura ma, a nun a yirefanyi sankura ma. ²⁶ A xa ture nde ifili a yete koola belexe kui. ²⁷ A xa na ture kasan sanmaya solofere a belexesole yirefanyi ra n tan Alatala ya i. ²⁸ Ture naxan na a belexe kui, a xa dondoronti tongo, a na sa furema yirefanyi tuli ma, a yirefanyi belexekura ma, a nun a yirefanyi sankura ma wuli fari naxan keli yete ragbilen serexe ma. ²⁹ Ture naxan luxi a belexe kui, a xa na sa na furema xunyi ma, alako a xun xa sara n tan Alatala ya i. ³⁰ Serexedube xa ganbe keren ba, xa na mu a ra kolokonde yore, serexee ya ma furema naxee sotoxi. ³¹ A xa keren ba yunubi xafari serexe ra, boore xa findi serexe gan daaxi ra, a nun sansi xori dinxi. Serexedube furema xun sarama n tan Alatala ya i na ki ne. ³² Seriyē nan na ki maraseniyeanyi xa fe ra furemae be naxee findixi setaree ra.»

³³ Alatala naxa a masen Annabi Munsa nun Haruna be, ³⁴ «Wo na so Kanaan boxi ma, n naxan fima wo ma ke ra, xa fure jaaxi sa mini wo xa banxi kankee ma menni, ³⁵ banxi kanyi xa sa a fala serexedube be, «N bara fure jaaxi to n ma banxi ma.» ³⁶ Serexedube xa yaamari fi, e xa se birin namini banxi kui beenu a xa siga fure jaaxi matode, alako se naxan na banxi kui, na naxa findi se seniyeantare ra. E na ge na rabade, serexedube xa siga na banxi matode.»

³⁷ «Serexedube xa na fure mato. Xa fure fooro, xa na mu a ra a gbeeli, a man naxa tilin, a banxi kanke suxu, ³⁸ serexedube xa mini banxi kui, a xa banxi naade balan loxun keren. ³⁹ Xi solofere nde loxo, serexedube man xa gbilen naa. Xa fure bara lantan ye i banxi kanke ma, ⁴⁰ serexedube xa yaamari fi, banxi gemee xa ba na fure na dennaxe, e xa e wole taa fari ma yire seniyeantare. ⁴¹ Banxi kanke xa maxoolin banxi kui. Naxan bama, na xa woli taa fari ma yire seniyeantare. ⁴² Geme gbete xa sa booree joxo ra, banxi kanke xa maso a neene ra.»

⁴³ «Na wali birin dangi xanbi, xa fure jaaxi man mini banxi ma, ⁴⁴ serexedube xa

gbilen na mato ra. Xa fure bara lantan ye i banxi kui, fure jaaxi na a ra, a findixi se seniyentare nan na. ⁴⁵ Na banxi xa rabira, a gemee, a wurie, nun a maso bende birin xa wole taa fari ma yire seniyentare. ⁴⁶ Naxan yo soma na banxi kui a balan xanbi, na kanyi fan findima mixi seniyentare ra han nunmare ra. ⁴⁷ Naxan na a sa na banxi kui, xa na mu a ra a a dege naa, na lanma a xa a xa dugie xa.»

⁴⁸ «Na banxi yailan xanbi, xa serexedube sa gbilen na banxi kui, a fa a to fure mu lantanxi a i, a xa masenyi ti, na banxi bara seniyen, fure bara jon naa. ⁴⁹ Na banxi kanyi xa na maraseniyyeni rakamali serexe bafe ra. A xa xoni firin, sediri wuri, gere mooli nde, nun hisopi wuri soto. ⁵⁰ A xa xoni keren kon naxaba feje nde xun ma dulon ye na naxan kui. ⁵¹ A xa sediri wuri, hisopi wuri, gere mooli nde, nun xoni pipe sin xoni kon naxaba wuli xora, naxan na dulon ye kui. A xa a kasan banxi ma sanmaya solofere. ⁵² A xa banxi raseniyyen xoni wuli, dulon ye, xoni pipe, sediri wuri, hisopi wuri, nun gere mooli nde ra. ⁵³ A xa xoni pipe bepin taa fari ma wula i. Na kui, na banxi xa fe jaaxi jonma ne, a seniyen.»

⁵⁴ «Seriye nan na ki fure jaaxie xa fe ra naxee minima mixi fate ma, ⁵⁵ dugie ma, banxie ma, ⁵⁶ naxee funtuma, naxee bulama, naxee fiixema, ⁵⁷ alako a xa kolon xa se seniyenxi nan a ra, xa na mu a ra a mu seniyenxi. Seriye nan na ki na fure jaaxi xa fe ra.»

15

Korosila kanyi

nun gine xa kike wali

¹ Alatala naxa a masen Annabi Munsa nun Haruna be, ² «Wo xa a fala Isirayilakae be, korosila kanyi bara findi mixi seniyentare ra. ³ Korosila kanyi bara findi mixi seniyentare ra hali korosila mu na minife sinden, konso a na a fate kui. ⁴ Korosila kanyi sama sade naxan ma, se seniyentare na a ra. A doxo gonyi naxan yo ma, na fan se seniyentare na a ra. ⁵ Naxan na din a xa sade ra, na kanyi xa a xa dugie xa, a xa a yete maxa ye ra. A findi mixi seniyentare ra han nunmare ra. ⁶ Naxan doxoma a xa gonyi ma, na kanyi xa a xa dugie xa, a xa a yete maxa ye ra. A findima mixi seniyentare ra han nunmare ra. ⁷ Naxan yo din na furema fate ra, na kanyi xa a xa dugie xa, a xa a yete maxa ye ra. A findi mixi seniyentare ra han nunmare ra. ⁸ Xa furema de ye boxun mixi seniyenxi nde ma, na kanyi xa a xa dugie xa, a xa a yete maxa. A findi mixi seniyentare

ra han nunmare ra. ⁹ Dɔxɔse naxan sama soe ma, xa na mu a ra ɲɔxɔmɛ ma, xa furema dɔxɔ na fari, na dɔxɔse findima se seniyyentare ra. ¹⁰ Naxan na din sese ra furema bara dɔxɔ naxan fari, na kanyi bara findi mixi seniyyentare ra han nunmare ra. Na kanyi xa a xa dugie xa, a xa a yete maxa. ¹¹ Furema belexe seniyyentare kanyi dinma mixi naxan na, na xa a xa dugie xa, a xa a yete maxa ye ra. A findi mixi seniyyentare ra han nunmare ra. ¹² Furema dinma feɲe naxan na, na xa kana. Xa yirabase wuri daaxi na a ra, a lan a xa maxa ye ra.»

¹³ «Kɔrɔsila kanyi na yalan, a mame ti lɔxun keren beenu a xa findi mixi seniyyenxi ra. A xa a xa dugie xa, a xa a maxa dulonyi ye ra. A seniyyenma na ki ne. ¹⁴ Xi solomasaxan nde lɔxɔɛ, a xa ganbe firin tongo, xa na mu a ra kolokonde yɔre firin, a sa e so serexedube yi ra n tan Alatala ya i hɔrɔmɔlingira sode de ra. ¹⁵ Serexedube xa xɔni keren ba yunubi xafari serexe ra, boore serexe gan daaxi. Na kui, kɔrɔsila kanyi bara a xun sara n tan Alatala ya i.»

¹⁶ «Xa xeme nde a xa wantanyi nɔxɔ, a xa a fate birin maxa. A findi mixi seniyyentare ra han nunmare ra. ¹⁷ Dugi nun kiri naxan birin nɔxɔ, e xa maxa ye ra, e fan findi se seniyyentare ra han nunmare ra. ¹⁸ Xa xeme nun gine kafu e boore ra, e xa e fate maxa. E findi mixi seniyyentaree ra han nunmare ra.»

¹⁹ «Gine naxan na a xa kike wali kui, a findima mixi seniyyentare ra lɔxun keren bun ma. Naxan na din a ra, a fan findima mixi seniyyentare ra han nunmare ra. ²⁰ Gine naxan na a xa kike wali kui, a sama sade naxan ma, se seniyyentare na a ra. A dɔxɔ sese naxan ma, na fan se seniyyentare na a ra. ²¹ Naxan yo na din a xa sade ra, na kanyi xa a xa dugie xa, a xa a yete maxa ye ra. A findi mixi seniyyentare ra han nunmare ra. ²² Naxan yo na dɔxɔ a xa gonyi ma, na kanyi xa a xa dugie xa, a xa a yete maxa ye ra. A findi mixi seniyyentare ra han nunmare ra. ²³ Xa se nde saxi na sade ma, xa na mu a ra na gonyi ma a nu dɔxɔxi naxan ma, naxan dinma na se ra a findima mixi seniyyentare ra han nunmare ra. ²⁴ Xa xeme nde nun na gine kafu, a xa kike wali wuli fa sa a fate ma, a fan findima mixi seniyyentare ra lɔxɔxun keren bun ma. A na sa sade yo ma, na fan findima se seniyyentare ra.»

²⁵ «Xa wuli lu mini ra gine ma, naxan mu findixi a xa kike wali wuli ra, xa na mu a ra a xa kike wali temui xɔn naxa kuya, a findima mixi seniyyentare nan na alɔ gine naxan na a xa kike wali kui. ²⁶ A na a sa sade naxan ma, xa na mu a ra a dɔxɔ gonyi naxan ma, na birin findima se seniyyentare ra alɔ a xa kike wali temui. ²⁷ Naxan dinma na

see ra, na kanyi xa a xa dugie xa, a xa a fate maxa ye ra. A findi mixi seniyentare ra han nunmare ra.»

²⁸ «Wuli na ba minife, na gine xa mame ti loxoƙun keren, a fa seniyen. ²⁹ Xi solofere nde loxoƙe, a xa ganbe firin, xa na mu a ra kolokonde yore firin tongo, a xa e xanin serexedube xon hɔrɔmɔlingira sode de ra. ³⁰ Serexedube xa xoni keren ba yunubi xafari serexe ra, boore serexe gan daaxi. Serexedube xunsare serexe bama na gine be n tan Alatala ya i na ki ne.»

³¹ «Wo xa Isirayilakae makuya seniyentareƙa ra, xa na mu a ra, e na e makore n ma hɔrɔmɔlingira ra naxan na wo tagi, e faxama ne.»

³² «Seriye nan na ki kɔrɔsila xa fe ra, a nun xeme naxan a xa wantanyi noxoƙma, ³³ gine naxan na kike wali kui, kɔrɔsila naxan minima xeme nun gine fate i, nun xeme naxan nun gine seniyentare kafuma.»

16

Xunsare loxoƙe

¹ Haruna xa di firinyi to faha e yete masenfe ra Alatala be, Alatala naxa a masen Annabi Munsa be, ² «A fala i taara Haruna be, a na so hɔrɔmɔlingira kui, a naxa lu dangi ra dugi gbakuxi ra xa a dangi temui mu a lixi, alako a naxa faha. Yire seniyenxi na a ra saate kankira na dennaxe. Xunsarade na na saate kankira nan fari, n minima nuxui kui dennaxe.»

³ «Haruna xa so hɔrɔmɔlingira kui tuura ra, naxan bama yunubi xafari serexe ra, a nun yexee kontonyi serexe gan daaxi ra. ⁴ A xa guba seniyenxi gese fute daaxi ragoro a ma, a xa wantanyi gese fute daaxi so. A xa a tagi ixiri beleti gese fute daaxi ra, a xa mafelenyi mafilin a xunyi ma. A na ge a maxade, a xa na dugi seniyenxi birin nagoro a ma. ⁵ Isirayila pama xa sikote firin so a yi ra yunubi xafari serexe ra, a nun yexee kontonyi keren serexe gan daaxi ra. ⁶ Haruna xa tuura ba a yete xa yunubi xafari serexe ra alako a tan nun a xa denbaya xun xa sara. ⁷ A xa na sikote firinyi ti n tan Alatala ya i, hɔrɔmɔlingira sode de ra. ⁸ A xa n tan Ala maxandi a xa tonxuma masen n be na sikote firinyi xa fe ra. Keren xa findi n tan Alatala gbe ra, boore xa lu Sentane be wula i. ⁹ Sikote naxan sugandixi n tan Alatala gbe ra, Haruna xa a ba yunubi xafari serexe ra. ¹⁰ Sikote naxan sugandixi a xa findi Sentane gbe ra, na mu faxama. Haruna xa a ti n tan Alatala ya i, a xa findi xunsare ra, a xa a beƙin sigafe ra wula i Sentane be. ¹¹ Haruna xa

tuura ba a yete xa yunubi xafari serexe ra, a xa findi a tan nun a xa denbaya xunsare ra. A xa na tuura kon naxaba yunubi xafari serexe ra.¹² A xa surayi ganse rafe te wole ra naxan tongoxi serexebade fari n tan Alatala ya i. A xa surayi fupi belexe ya firin fan tongo. A xa na birin xanin dugi gbakuxi xanbi ra yire seniyenxi kui.¹³ A xa na surayi gan n tan Alatala ya i, alako tuuri naxan tema na xa saate kankira noxun a ma alako a naxa faxe.¹⁴ A xa tuura wuli nde tongo a belexesole ra, a xa a kasan saate kankira makoto se ma xunsarade sogetede biri sanmaya solofere, a man xa a kasan na makoto se ya ra.¹⁵ A xa sikote kon naxaba jama xa yunubi xafari serexe ra, a fa a wuli xanin dugi gbakuxi xanbi ra. A xa na wuli kasan saate kankira makoto se ma nun saate kankira makoto se ya ra, alo a rabaxi tuura wuli ra ki naxe.»

¹⁶ «Na ki a xunsare sotoma yire seniyenxi be Isirayilakae xa seniyentarepa, e xa fe kobie, nun e xa yunubie xa fe ra. A xa a raba na ki horomolingira fan be, naxan tixi Isirayilaka seniyentaree tagi.¹⁷ Mixi yo naxa lu horomolingira kui han Haruna minima yire seniyenxi fisamante kui temui naxe. A xa a tan nun a xa denbaya xun sara, a nun Isirayila jama birin.¹⁸ A xa siga serexebade yire naxan na n tan Alatala ya i, a fa xunsare ba na serexebade be. A xa tuura nun sikote wuli sa ferie ma naxee nu na serexebade tunxunyi naanie ra.¹⁹ A xa wuli kasan a belexesole ra sanya solofere serexebade ma, alako a xa seniyen Isirayilakae xa seniyentarepa xa fe ra.»

²⁰ «Haruna na ge xunsare bade yire seniyenxi, horomolingira, nun serexebade be, a xa sikote boore maso naxan mu nu faxe.²¹ A xa a belexe firinyie sa na sikote xun tagi, a fa Isirayilakae xa seniyentarepa, e xa fe kobie, nun e xa yunubi birin masen n tan Ala be. A na ge na kote birin sade sikote xun, a xa na sikote bepin wula i mixi nde saabui ra naxan bara tin na wali ra.²² Na sikote yunubi birin xaninma a xun ma wula i, a bepin dennaxe.»

²³ «Na dangi xanbi, Haruna xa so horomolingira kui, a xa a xa dugi gese fute daaxie ba, a naxee ragoroxi a ma beenu a xa so yire seniyenxi kui. A xa nee lu na.²⁴ A xa a maxa ye ra yire seniyenxi kui, a dugi gbetee ragoro a ma. A na ge, a xa mini, a serexe gan daaxi firin ba, keren a yete be, boore jama be. A xunsare sotoma a yete be nun jama be na kui.²⁵ A man xa yunubi xafari serexe ture gan serexebade fari.»

²⁶ «Naxan sikote bepin wula i Sentane be, na lan a xa a xa dugie xa, a a fate maxa, a fa gbilen jama yonkinde.²⁷ Tuura nun sikote naxee baxi yunubi xafari serexe ra, naxee wuli findi xunsare ra yire seniyenxi, nee lan e xa xanin jama yonkinde fari ma, e kiri, e

sube, nun e jape birin xa gan te ra. ²⁸ Naxan na wali rabama, a xa a xa dugie xa, a xa a fate maxa ye ra, a fa gbilen jama yonkinde.»

²⁹ «Seriye nan na ki wo be naxan mu kanama abadan. Kike solofere nde, xi fu loxe, wo xa sunyi suxu, wo naxa wali yo raba, wo tan, nun mixi naxee sabatixi naa kono e mu findi Isirayilakae ra. ³⁰ Na findima xunsare loxe ra wo be, alako wo xa seniye, wo xa yunubi birin xa xafari n tan Alatala ya i. ³¹ Na findima malabui nun sali loxe ra wo be. Wo xa sunyi suxu na loxe. Yi seriye mu kanama abadan.»

³² «Ala naxan sugandixi, a naxan tixi serexedube kuntigi ra, na nan wo xun sarama. A luma a baba xa wali raba ra. A luma serexedube dugi seniye xie ragoro ra a ma. ³³ A luma yire seniye xie, horemolingira, serexebade, serexedube nun Isirayila jama birin xun sara ra. ³⁴ Yi seriye mu kanama abadan, alako je birin xunsare xa ba Isirayilakae be e xa yunubi birin ma fe ra.»

E Alatala xa yaamari birin suxu alo a masenxi Annabi Munsa be ki naxe.

17

Serexe bama dennaxe

¹ Alatala naxa a masen Annabi Munsa be, ² «A fala Haruna be nun a xa die be, a nun Isirayilaka birin be, Alatala yi nan yamarixi. ³ Isirayilaka naxan ninge, xa na mu a ra yexee, xa na mu a ra si bama serexe ra jama yonkinde kui, xa na mu a ra jama yonkinde fari ma, ⁴ a mu a xaninma horemolingira sode de xa ra alako a xa a fi n tan Alatala ma horemolingira yire, na kanyi luma ne alo faxeti. A bara faxe ti, a lanma na kanyi xa keri jama ya ma. ⁵ Yi yaamari wama a masenfe ne a Isirayilakae mu lanma e xa serexe ba burunyi. E xa fa xanunteya serexe ra serexedube nan xon n tan Alatala ya i n ma horemolingira sode de ra. ⁶ Serexedube xa na wuli kasan n tan Alatala xa serexebade seetie ma horemolingira sode de ra, a man xa na ture gan te i, a xa findi xiri fanyi ra n tan Alatala be. ⁷ Isirayilakae naxa sikote serexe ba kuye be sonon de. Na findima yanfanteya nan na n tan Alatala mabiri. Yi yaamari mu kanama abadan.»

⁸ «A fala e be, Isirayilaka, xa na mu a ra xope naxan sabatixi e tagi, xa a serexe gan daaxi, xa na mu a ra serexe gbete ba, ⁹ a mu a xanin horemolingira sode de ra, alako a xa fi n tan Alatala ma, na kanyi kerima ne a xa jama tagi.»

Wuli minfe tonyi

¹⁰ «Xa Isirayilaka nde, xa na mu a ra xope nde naxan sabatixi Isirayila boxi ma

wuli yo min, n gbilenma na kanyi fɔxɔ ra, n fa a kerɩ a xa jama ya ma, ¹¹ barima sube nii na a wuli nan kui. N bara wuli findi wo xunsare ra, naxan bama serexe ra serexebade fari. Wuli nan na xunsare ra. ¹² Na na a ra, n bara Isirayilakae yamari e naxa wuli min. Wo xa xɔɛ naxee sabatixi Isirayila bɔxi ma, e fan naxa wuli min de. ¹³ Xa Isirayilaka, xa na mu a ra xɔɛ nde naxan na wo tagi, sa sube nde, xa na mu a ra xɔni nde faxa naxan daxa a xa don, a xa na wuli ifili bɔxi ma, a bende sa a fari, ¹⁴ barima sube nii na a wuli nan kui. Na na a ra, n bara Isirayilakae yamari wo naxa sube wuli yo min, barima sube nii na a wuli nan kui. Naxan yo na raba, a fama keride Isirayila jama ya ma.»

¹⁵ «Xa Isirayilaka, xa na mu a ra xɔɛ nde naxan na wo tagi, na sube don naxan faxaxi a yete ma, xa na mu a ra sube gbete naxan faxaxi ki gbete ra, na kanyi xa a xa dugie xa ye ra, a man xa a yete maxa. A mu seniyeɲma han nunmare ra. ¹⁶ Xa a mu a xa dugie xa, xa a mu a yete maxa, na seniyeɲtareɲa luma ne a ma.»

18

Kafui seriye

¹ Alatala naxa a masen Annabi Munsa be, ² «A fala Isirayilakae be Alatala nan n na, wo Marigi Ala. ³ Wo naxa Misirakae xa naamunye raba, wo nu na dennaxe. Wo man naxa Kanaankae fan ma naamunye raba, n wo xaninma dennaxe. Wo naxa bira e xa seriye fɔxɔ ra. ⁴ Wo xa n tan nan ma seriye nun n ma yaamarie rabatu, barima Alatala nan n na, wo Marigi Ala. ⁵ Wo xa bira n ma seriye nun n ma yaamarie nan fɔxɔ ra. Mixi naxan nee rabatuma, a simaya sɔtoma nee nan saabui ra. Alatala nan n na.»

⁶ «Wo naxa kafu wo wo nun wo barima. Alatala nan n na.»

⁷ «Wo naxa kafu wo wo nun wo nga, naxan findixi wo baba gbe ra. Wo nga nan wo nga ra, wo naxa kafu a ra.»

⁸ «Wo naxa kafu wo wo nun wo nanden, naxan findixi wo baba xa gine ra.»

⁹ «Wo naxa kafu wo wo nun wo maagine, naxan findixi wo baba xa na mu a ra wo nga xa di ra, naxan barixi wo xɔnyi xa na mu a ra yire gbete.»

¹⁰ «Wo naxa kafu wo wo nun wo xa di xeme xa di gine, wo naxa kafu wo wo nun wo xa di gine xa di gine. E fatanxi wo yete fate nan na.»

¹¹ «Wo naxa kafu wo wo nun wo baba xa gine gbete xa di gine, wo baba naxan barixi. Wo maagine na a ra.»

¹² «Wo naxa kafu wo nun wo baba maagine ra. Wo baba bariboore na a ra.»

¹³ «Wo naxa kafu wo nun wo nga xunya, xa na mu a ra a taara. Wo nga bariboore na a ra.»

¹⁴ «Wo naxa kafu wo nun wo baba xunya xa gine, xa na mu a ra a taara xa gine. Wo baba xunya xa na mu a ra a taara nan gbe findixi na ginee ra. Wo nga nun wo mama nan lanxi e ma.»

¹⁵ «Wo naxa kafu wo nun wo xa di xa gine, wo xa di nan gbe a ra.»

¹⁶ «Wo naxa kafu wo nun wo xunya, xa na mu a ra wo taara xa gine, naxan findixi a gbe ra.»

¹⁷ «Xa wo nun gine nde bara kafu, wo nun a xa di gine tan naxa kafu de. Wo nun a xa di xeme xa di gine naxa kafu de, wo nun a xa di gine xa di gine naxa kafu de. Baribooremae na e ra, na fe mooli mu fan.»

¹⁸ «Wo nun wo xa gine xunya naxa kafu de, xa na mu a ra a taara, wo xa gine xa simaya kui. Na fe fama ne toone ra.»

¹⁹ «Wo nun gine naxa kafu a xa kike wali kui de, barima a mu seniyenxi na temui.»

²⁰ «Sade fe naxa lu wo nun wo malanboore xa gine tagi de, na findima seniyentareja nan na.»

²¹ «Wo naxa wo xa di yo ba serexe ra Moloko kuye be. Wo naxa wo Marigi Ala xili bexu. Alatala nan n na.»

²² «Xeme naxa kafu nun xeme ra. Fe jaaxi na a ra. Xeme lanma e nun gine nan xa kafu.»

²³ «Xeme naxa kafu nun sube ra. Gine fan naxa kafu nun sube ra. Na fe mooli mu fan feo.»

²⁴ «Wo naxa wo manxo yi fe moolie ra, alo na sie a rabaxi ki naxe n naxee keri wo ya ra. ²⁵ E xa fe jaaxie bara boxi yati manxo. N e ratonxi na nan ma, e mu luma yi boxi ma sonon. ²⁶ Wo tan Isirayilakae nun xone naxee na wo tagi, wo xa n ma seriye nun n ma yaamarie rabatu. Wo naxa yi fe xonxie raba de. ²⁷ Bekae nu bara na mooli raba beenu wo xa fa. Yi boxi findi yire seniyentare ra na nan ma. ²⁸ Xa wo fan bira na mooli foxo ra, wo fan kerima ne yi boxi ma. ²⁹ Mixi yo naxan na mooli rabama, a kelima ne a xa jama ya ma. ³⁰ Wo xa n ma yaamarie rabatu, wo naxa na fe xonxie raba alo mixi naxee nu na be beenu wo xa fa. Wo naxa findi mixi seniyentaree ra. Alatala nan n na, wo

Marigi Ala.»

19

Tinxinyi naxan nafa Ala ma

¹ Alatala naxa a masen Annabi Munsa be, ² «A fala Isirayilakae be, wo xa seniye, barima n tan seniye, wo Marigi Alatala. ³ Birin xa e nga nun e baba binya. Birin xa malabui loxo seriye rabatu. Alatala nan n na, wo Marigi Ala.»

⁴ «Wo naxa kuyee batu, wo naxa wure raxunu kuye yailanfe ra. Alatala nan n na, wo Marigi Ala.»

⁵ «Wo xa xanunteya serexe ba n tan Alatala be a raba ki ma. ⁶ Serexe sube xa don a faha loxo, xa na mu a ra na kuye iba. Sube naxan a xi saxon nde lima, na xa sa te i. ⁷ Naxan luma han xi saxon, a raharamuxi, a mu lan na moli xa don. ⁸ Naxan na rabama, a na sare soto ma ne, barima a bara n tan Alatala xa se seniye xi yelebu. Na kanyi raminima ne Isirayila jama ya ma.»

⁹ «Wo na xe xaba wo xonyi, wo naxa a tuxuie xaba. Baloe naxan birama boxi ma, wo xa na lu naa. ¹⁰ Wo na weni bogi ba wo xa sansie kon na, wo naxa gbilen a ma a firin nde. Bogi naxee fan yolonma e yete ma, wo xa nee fan lu na setaree be, a nun mixie be naxee kelixi jama ne gbetee ma. Alatala nan n na, wo Marigi Ala.»

¹¹ «Wo naxa muje ti. Wo naxa wule fala. Wo naxa wo boore yanfa. ¹² Wo naxa wo kali n xili ra wule fari, barima na kui wo wo Marigi Ala xili nan kanama. Alatala nan n na.»

¹³ «Wo naxa wo ngaxakerenyi tooro, wo naxa a muja. Wo naxa wo xa walike xa wali sare lu han tina.»

¹⁴ «Wo naxa tulixori konbi, wo naxa donxui rabira. Wo xa gaaxu n tan Ala ya ra. Alatala nan n na.»

¹⁵ «Wo naxa kiiti sa tinxintareya ra. Wo naxa setare rafisa a boore be, wo naxa banna rafisa a boore be. Wo xa kiiti birin sa tinxinyi ra. ¹⁶ Wo naxa wo boore mafala. Wo naxa wo boore tojege alako a xa faha. Alatala nan n na. ¹⁷ Wo naxa wo ngaxakerenyi xon. Wo xa wo boore rasi, alako wo naxa yunubi soto a xa fe ra. ¹⁸ Wo naxa wo gbepoxo. Wo naxa gbesenxonneya ragata wo sondonyi kui wo ngaxakerenyi be. Wo xa wo boore xanu alo wo wo yete xanuma ki naxe. Alatala nan n na.»

¹⁹ «Wo xa n ma yaamarie rabatu. Wo naxa xuruse moli firin rate e boore ma. Wo

naxa sansi mooli firin si xe keren ma. Wo naxa dugi ragoro wo ma naxan degexi gese mooli firin na.»

²⁰ «Xa xeme nde nun konyi gine nde kafu xeme gbete naxan xa kote dɔxɔxi, naxan xun mu saraxi sinden, naxan mu xoreyaxi, e xa jaxankata. Konɔ wo naxa e faxa, barima konyi gine nan a ra. ²¹ Na xeme xa yexee kontonyi ba yete ragbilen serexe ra n tan Alatala be hɔrɔmɔlingira sode de ra. ²² Serexedube xa na yexee kontonyi findi xunsare ra a be n tan Alatala ya i, a xa findi yete ragbilen serexe ra alako a xa yunubi xa xafari.»

²³ «Wo na so bɔxi kui n naxan fima wo ma, wo naxa wo xa sansi sixie bogie don sinden han je saxan. E mu seniye, e luxi alɔ sunnetare. Wo naxa e don. ²⁴ Naxee fan bogima je naani nde ma, na birin fima n tan Alatala nan ma, a xa findi n ma matɔxɔe ra. ²⁵ Naxee bogima je suuli nde ma, na tan birin findima wo baloe nan na. Alatala nan n na, wo Marigi Ala.»

²⁶ «Wo naxa sube yo don wo mu naxan kon naxabaxi, a wuli xa mini. Wo naxa sematoe wali raba, wo naxa duureya raba. ²⁷ Wo naxa wo xunxexe maxaba wo xunyi seetie ma a radigilixi ra, wo naxa wo de xabe seetie maxaba, ²⁸ wo naxa wo fate maxaba jɔnyi to soxi wo ma. Wo naxa pirinti ti wo fate ma. Alatala nan n na.»

²⁹ «Wo naxa wo xa di gine mati langoe ra, alako wo xa bɔxi naxa bira langoeɲa fɔxɔ ra, a xa rafe fe jaaxie ra. ³⁰ Wo xa n ma malabui lɔxɔee binya, a nun n ma yire seniye. Alatala nan n na.»

³¹ «Wo naxa mixi fen naxan mixi faxaxie rawoyenma. Wo naxa bira sematoee fɔxɔ ra, xa na mu a ra wo findima seniye. Alatala nan n na, wo Marigi Ala.»

³² «Wo xa mixi mɔxie binya, naxee xunxexe bara fiixe. Wo xa gaaxu wo Marigi Ala ya ra. Alatala nan n na.»

³³ «Wo naxa mixi rawali a jaaxi ra, naxee kelixi jamanɛ gbete e xa sabati wo xa bɔxi kui. ³⁴ Wo xa na xɔje mooli rasene alɔ wo ngaxakerenyi. Wo xa a xanu alɔ wo wo yete xanuma ki naxe. Wo fan nu na xɔneya nan kui Misira bɔxi ma. Alatala nan n na, wo Marigi Ala.»

³⁵ «Wo naxa tinxintareya yo raba, kiiti sade, se kuyeya maniyade, se binye maniyade, se rafe daaxi maniyade. ³⁶ Wo xa sikeeli xa kamali. Wo se maniyase kamalixie rawali. Alatala nan n na, wo Marigi Ala, naxan wo ramixi Misira bɔxi ma. ³⁷ Wo xa n ma seriye nun n ma yaamari birin nabatu. Alatala nan n na.»

Fe xɔnxie Ala mabiri

¹ Alatala naxa a masen Annabi Munsa be, ² «A fala Isirayilakae be, xa Isirayilaka nde, xa na mu a ra xɔne nde naxan sabatixi Isirayila bɔxi ma, a xa di nde ba serexe ra Mɔlɔkɔ kuye be, jama xa na kanyi magɔnɔ gemee ra han a xa faxe. ³ N tan fan gbilenma ne na mixi fɔxɔ ra, n a ramini jama ya ma, barima a bara n ma yire seniyenxi yelevu, a bara n xili seniyenxi kana na serexe mɔoli ra Mɔlɔkɔ kuye be. ⁴ Xa jama a ya raxi na fe ma, e tondi mixi faxade, naxan a xa di baxi serexe ra Mɔlɔkɔ be, ⁵ n tan gbilenma ne na mixi nun a xabile fɔxɔ ra, n nee keri e xa jama ya ma, a nun mixi birin naxee n yanfama Mɔlɔkɔ kuye xa fe ra.»

⁶ «Xa mixi nde n yanfa, a bira sematoe fɔxɔ ra, a nun mixi naxan mixi faxaxie rawoyenma, n gbilenma na kanyi fɔxɔ ra, n a keri a xa jama ya ma. ⁷ Wo xa wo jere seniyenxi kui, alako wo xa seniyen, barima Alatala nan n na, wo Marigi Ala. ⁸ Wo xa n ma yaamarie rabatu, wo xa e ratinme. Alatala nan n na, naxan wo raseniyeenma.»

⁹ «Naxan yo a baba danka, xa na mu a ra a nga, wo xa na kanyi faxe. A tan nan a faxe fe ragirixi, barima a bara a baba danka, xa na mu a ra a nga.»

¹⁰ «Xa xeme nde yene raba a malan boore xa gine ra, na xeme nun na gine xa faxe e xa langoepa xa fe ra.»

¹¹ «Xa xeme nde kafu nun a baba xa gine ra, a bara fe jaaxi raba a baba ra. Wo xa na xeme nun na gine faxe e xa yunubi xa fe ra.»

¹² «Xa xeme nde kafu nun a xa di xa gine ra, wo xa e firinyi birin faxe na yunubi xa fe ra, barima na fe mɔoli mu fan feo.»

¹³ «Xa xeme nde kafu nun xeme gbete ra alo xeme darixi a raba ra gine ra ki naxe, wo xa e firinyi birin faxe na fe xɔnxi xa fe ra.»

¹⁴ «Xa xeme nde kafu nun gine ra nun na xa di gine ra, e bara fe jaaxi raba. Wo xa e gan te ra, xeme nun gine, alako na fe xɔnxi mɔoli naxa lu wo tagi.»

¹⁵ «Xa xeme nde kafu nun sube ra, wo xa na xeme nun na sube birin faxe.»

¹⁶ «Xa gine nde a maso sube ra kafu boorepa ra, wo xa na gine nun na sube faxe na fe jaaxi xa fe ra.»

¹⁷ «Xa xeme nde kafu nun a maagine ra, a baba xa di gine, xa na mu a ra a nga xa di gine, fe mayaagixi nan a ra. Wo xa e keri e xa jama ya ma, barima xeme bara kafu

nun a maagine ra. Na kote xa lu a xun ma.»

¹⁸ «Xa xeme nde kafu nun gine ra naxan na a xa kike wali kui, a wuli naxa mini kene ma. E firinyi birin xa keru jama ya ma na fe ma.»

¹⁹ «Wo naxa kafu nun wo nga xunya, xa na mu a ra wo nga taara ra, xa na mu a ra wo baba maagine ra, barima wo bariboore nan e ra. Naxan na mooli rabama na kote xa lu a xun ma.»

²⁰ «Xa xeme nde kafu nun a baba xunya xa gine ra, xa na mu a ra a baba taara xa gine ra, e na kote xaninma ne. E birin fama faxade dibaritarepa nan kui.»

²¹ «Xa xeme nde kafu nun a xunya xa gine ra, xa na mu a ra a kafu nun a taara xa gine ra, a bara fe seniyentare raba. E birin fama faxade dibaritarepa nan kui.»

²² «Wo xa n ma seriye nun n ma yaamari birin nabatu, wo xa na birin naba, alako wo mu fama keride ki naxe boxi ma n wo rasabatima dennaxe. ²³ Wo naxa bira na boxi sie xa seriye foxo ra, n fama naxee keride wo ya ra. E naxan nabama na mu rafanxi n ma feo. ²⁴ N bara a fala wo be na boxi findima wo gbe ra. N bara na boxi fi wo ma, xipe nun kumi gbegbe na dennaxe. Alatala nan n na, wo Marigi Ala, naxan wo sugandixi sie tagi. ²⁵ Wo xa sube raharamuxie nun sube radaxaxie tagi rasa, e nun xoni raharamuxie nun xoni radaxaxie, alako wo naxa findi seniyentaree ra e saabui ra. N bara tonyi doxo na subee, na xonie, nun na boximasee ra. E mu seniye. ²⁶ Wo xa findi n ma jama seniye nxi ra, barima n tan Alatala nan seniye. N bara wo sugandi sie tagi, alako wo xa findi n gbe ra.»

²⁷ «Mixi yo naxan mixi faxaxie rawoyenma, xa na mu a ra a findi sematoe ra, wo xa a magono gemee ra han a xa faxa. A tan nan a faxa fe ragirixi.»

21

Serexedube xa seniye nxi

¹ Alatala naxa a masen Annabi Munsa be, «A fala Haruna xa di serexedubee be, serexedube naxa a yete findi seniyentare ra a xa mixi nde fure saabui ra, ² fo a xa mixi kende nde alo a nga, a baba, a xa di xeme, a xa di gine, a xunya xemema, a taara xemema, ³ nun a maagine, ginedimedi na naxan na, a mu doxoxi xeme taa sinden, a na a xonyi. Serexedube na din e fure ra, a findima ne mixi seniyentare ra. ⁴ A mu lanma serexedube xa findi seniyentare ra a xa gine fure xa fe ra, xa na mu a ra a xa gine xa mixie fure xa fe ra.»

⁵ «Xa jɔnfe bara a li, a mu lanma serɛɛdube xa a xunyi bi, xa na mu a ra a de xabee seeti maxaba, xa na mu a ra a fate maxaba. ⁶ E xa seniyeɛ e Marigi Ala be. E naxa e Marigi Ala xili kana, barima e tan nan serɛɛ gan daaxie bama n tan Alatala be, naxee luxi alɔ n ma donse. E lan e xa seniyeɛ na nan ma. ⁷ A mu lanma serɛɛdube xa langoe gine dɔxɔ, xa na mu a ra gine futi kane, xa na mu a ra gine xeme meexi naxan na. Serɛɛdube tan seniyeɛ a Marigi Ala be. ⁸ Wo xa a kolon mixi seniyeɛxi ra, barima a tan nan serɛɛ fima Ala ma naxee luxi alɔ donse. Wo xa a kolon a seniyeɛ, barima n tan Alatala seniyeɛ, n tan naxan wo raseniyeɛma. ⁹ Xa serɛɛdube xa di gine nde a yete rayaagima findife ra langoe ra, a bara a baba rayaagi. A lanma na gine xa gan te ra.»

¹⁰ «Serɛɛdube kuntigi naxan sugandixi a ngaxakerenyie tagi, e ture seniyeɛxi sa a ma, e dugi seniyeɛxi ragoro a ma, na naxa a xunseɛ kana, a naxa a xa dugi ibɔɔ. ¹¹ A naxa so fure xun ma, a naxa findi seniyeɛtare ra fure xa fe ra, hali a baba xa na mu a ra a nga. ¹² A naxa mini yire seniyeɛxi kui, a naxa a Marigi Ala xa hɔrɔmɔlingira manɔxɔ, barima n tan Ala nan a sugandixi, ture seniyeɛxi saxi a xunyi ma. Alatala nan n na. ¹³ A xa gineɛdimedi dɔxɔ gine ra. ¹⁴ A naxa kaape gine dɔxɔ, a naxa gine rabeɛpinxi dɔxɔ, a naxa langoe dɔxɔ, a naxa gine dɔxɔ gineɛdimedi mu naxan na. A xa gineɛdimedi tongo gine ra a xa mixie ya ma, ¹⁵ alako a naxa a bɔnsɔe rayaagi. Alatala nan n na naxan a raseniyeɛma.»

¹⁶ Alatala naxa a masen Annabi Munsa be, ¹⁷ «A fala Haruna be, mixi mabenxi yo naxa serɛɛdube wali raba, a serɛɛ sa serɛɛbade ma n tan Ala be. Na mu lanma abadan. ¹⁸ Mabenyie nan ya naxee mu daxe e xa e maso serɛɛbade ra: naxan ya mu fan, naxan mu noma jereɛde a fanyi ra, naxan salonse nde kanaxi, ¹⁹ naxan beɛɛɛ, xa na mu a ra sanyi giraxi, ²⁰ naxan kuntinxi, naxan xa kuye mu kamalixi, naxan ya mu fanxi, fate kiri fure na naxan ma, nun xeme banaxi. ²¹ Mabenyi yo fatan serɛɛdube Haruna xabile ra, a naxa a maso n tan Alatala xa serɛɛbade ra serɛɛ bafe ra a Marigi Ala be. ²² A noma n tan Ala xa donse seniyeɛxi mɔoli birin donde, ²³ kɔnɔ a mu lan a xa a maso yire seniyeɛxi fisamante xa dugi ra, xa na mu a ra serɛɛbade ra. A naxa n ma yire seniyeɛxi xili kana, barima Alatala nan n na, naxan a raseniyeɛma.» ²⁴ Annabi Munsa naxa na masenyi ti Haruna, a xa die, nun Isirayilaka birin be.

¹ Alatala naxa a masen Annabi Munsa be, ² «A fala Haruna nun a xa die be, e xa Isirayilakae xa serexe seniyenxie ba a ba ki ma, barima e nee fima n tan nan ma. Serexedubee naxa n xili seniyenxi kana. Alatala nan n na.»

³ «A fala e be, xa e bonsœ mixi nde sa findi seniyentare ra, a naxa a maso Isirayilakae xa serexe ra e naxee fima n tan Alatala ma, na kanyi kerima ne n ya i. Alatala nan n na.»

⁴ «Kune fure na mixi yo ma Haruna bonsœ ya ma, xa na mu a ra korosila fure, na mu lan a xa serexe seniyenxi don fo a xa ge seniyende. A man mu lan mixi xa na raba xa a bara din mixi nde ra naxan bara din mixi fure ra. Xa ye seniyentare na minife mixi xemeya kui, a mu lan a xa serexe seniyenxi don. ⁵ Xa mixi nde bara din bubuse ra, xa na mu a ra mixi seniyentare ra, na mu lan a xa serexe seniyenxi don. ⁶ Naxan na rabama, na kanyi findima seniyentare nan na han nunmare. Beenu a xa na serexe seniyenxi don, a xa a fate maxa. ⁷ Soge na goro, a bara seniyen, a noma serexe seniyenxi donde sonon, barima a baloe na a ra.»

⁸ «Serexedube naxa sube don naxan faxaxi a yete ma. A man naxa sube don sube gbete naxan faxaxi, alako a naxa findi seniyentare ra. Alatala nan n na.»

⁹ «Serexedubee xa n ma yaamarie rabatu e baloe xa fe ra, alako e naxa yunubi soto, e fa faxa. Alatala nan n na, naxan e raseniyenma. ¹⁰ Mixi yo naxa serexe seniyenxi don xa serexedube mu a ra. Hali serexedube xa xœpe, xa na mu a ra a xa walike mu lanma a xa a don. ¹¹ Kono serexedube xa konyi, a naxan sara kobiri ra, a nun na konyi xa denbaya tan noma serexedube baloe donde. ¹² Serexedube xa di gine naxan doxoxi xeme Ala kolontare xon ma, naxa serexe seniyenxi don. ¹³ Serexedube xa di gine naxan findixi kaape gine ra, xa na mu a ra xeme meexi naxan na e mu di bari, a gbilen a baba xonyi alo a nu na naa ki naxe a dimedi ra, na gine noma a baba baloe donde. Mixi yo naxan mu findi Isirayilaka ra, na mu lanma a xa na mooli don. ¹⁴ Xa mixi nde sa serexe seniyenxi don kolontareya ma, a lan a xa a joxœ fi kobiri ra, a man xa nde sa na fari. Na findima kobiri naxan na, a na donse sare nan itaxunma doxo suuli ra, a fa doxo keren ba a ra, a na so serexedube yi ra. ¹⁵ Serexedubee naxa fe raba n tan Alatala xa serexe seniyenxie ra, a mu lan naxan xa raba ¹⁶ alako e naxa yunubi soto na serexœ xa fe ra e naxee donxi. Alatala nan n na, naxan e raseniyenma.»

¹⁷ Alatala naxa a masen Annabi Munsa be, ¹⁸ «A fala Haruna, a xa die, nun Isirayilakae birin be, Isirayilakae birin, a nun xœpe naxee sabatixi Isirayila boxi ma, mixi

naxan serexe gan daaxi bama n tan Alatala be laayidi nde rakamalife ra, xa na mu a ra a yete janige rabafe ra,¹⁹ a lan a xa tuura nan ba, xa na mu a ra yexee kontonyi, xa na mu a ra sikote, lanyuru mu na naxan ma.²⁰ Wo naxa xuruse yo ba lanyuru na naxan ma, barima n tan Ala mu na mooli rasuxuma.²¹ Xa mixi nde wama xuruse xungbe, xa na mu a ra xuruse lanma bafe xanunteya serexe ra n tan Alatala be, laayidi nde rakamalife ra, xa na mu a ra janige rabafe ra, na xuruse fate xa fan, lanyuru yo naxa lu a ma, xa na mu a ra n tan Ala mu a rasuxuma.²² Wo naxa xuruse yo ba naxan ya mu fan, naxan maxonoxi, naxan mabenxi, fure na naxan kiri ma. Wo naxa na mooli sa n tan Alatala xa serexebade fari, a xa findi serexe gan daaxi ra.²³ I noma ninge, xa na mu a ra yexee kepa paaxi bade janige serexe ra, konon i mu noma na bade laayidi rakamali serexe ra de.²⁴ Wo naxa xuruse banaxi, xemeya kanaxi, xa na mu a ra xemeya mu naxan be, ba serexe ra n tan Alatala be. Wo naxa na mooli ba serexe ra wo xa boxi ma.²⁵ Wo naxa na xuruse mooli rasuxu xonee yi ra, wo xa e ba serexe ra wo Marigi Ala be, barima e fate mu fanxi, e mu kamalixi. N tan Ala mu nee rasuxuma.»

²⁶ Alatala naxa a masen Annabi Munsa be,²⁷ «Ninge yore, yexee yore, nun si yore na bari, e xa lu e nga bun ma xi solofere, beenu e xa findi serexe ra n tan Alatala be.²⁸ Wo naxa ninge, xa na mu a ra yexee, nun a xa di kon naxaba loxe keren kui.»

²⁹ «Wo xa tantui serexe ba n tan Alatala be a ba ki ma alako n xa a suxu.³⁰ Wo xa na serexe don na loxe yati, a naxa lu han geesege. Alatala nan n na.»

³¹ «Wo xa n ma yaamarie rabatu, wo xa e suxu. Alatala nan n na.³² Wo naxa n xili seniyeenxi kana. Isirayilakae birin xa a kolon n seniyeen. Alatala nan n na, naxan wo raseniyeenma.³³ N tan nan wo ramini Misira boxi ra, n xa findi wo Marigi Ala ra. Alatala nan n na.»

23

Isirayila sali loxoe

¹ Alatala naxa a masen Annabi Munsa be,² «A fala Isirayilakae be, n tan Alatala xa sali loxoe nan ya, naxee seniyeenxi wo be.³ Wo xa wali xi senni, konon xi solofere nde findixi malabui loxe nan na, malanyi seniyeenxi rabama loxe naxe. Wo naxa wali yo raba na loxe. Na findixi n tan Alatala nan gbe ra. Wo xa na seriye suxu wo sabatide birin.»

⁴ «N tan Alatala xa sali loxe gbetee nan ya, wo pama maxilima loxe naxee ma:⁵

Kike singe, xi fu nun naani nde, soqe dula temui, Sayamaleke Dangi Sali serexe xa ba n tan Alatala be. ⁶ N tan Alatala xa Taami Lebinitare Sali foloma na kike xi fu nun suuli nde loxo ne. Wo xa taami lebinitaree don na xi solofere bun ma. ⁷ Na sali xi singe kui, wo xa malanyi seniye nxi raba. Wo naxa wali yo raba na loxo. ⁸ Wo xa serexee gan daaxie ba n tan Alatala be na xi solofere bun ma. Xi solofere nde loxo, wo man xa malanyi seniye nxi raba. Wo naxa wali yo raba na loxo.»

⁹ Alatala naxa a masen Annabi Munsa be, ¹⁰ «A fala Isirayilakae be, wo na so boxi ma n naxan fima wo ma, wo na xe xaba, wo xa a xiri singe xanin serexedube xon. ¹¹ Serexedube xa na masen n tan Alatala be malabui loxo dangi xanbi, alako n xa a suxu wo be. ¹² Wo na xiri singe masenma n tan Ala be loxo naxe, wo man xa yexee fanyi je keren daaxi ba serexe gan daaxi ra n be, ¹³ a nun sansi xori dinxi konbo ya keren naxan masunbuxi ture ra. Na findima serexe ra n tan Alatala be naxan xiri rafan n ma. Wo man xa weni litiri keren ba minse serexe ra. ¹⁴ Wo naxan soto xe xaba temui, wo naxa sese don, taami, tonsa ganxi, nun sansi xori ra, beenu wo xa na serexe ba wo Marigi Ala be. Seriyen na na ki wo tonsa be wo sabatide birin. Na mu kanama abadan.»

¹⁵ «Fola malabui loxo kuye iba, wo na xiri singe bama serexe ra loxo naxe, loxon solofere xa dangi. ¹⁶ A xi tongo suuli nde, malabui loxo xi solofere nde kuye iba, wo man xa serexe ba n tan Alatala be daxamui neene ra. ¹⁷ Wo xa fa taami firin na wo naxan fima n tan Alatala ma, kelifa ra wo xonye. Wo xa e yailan sansi xori luxutaxi konbo ya keren na, wo lebini sunbu a ra. Bogise singe serexe nan na ki n tan Alatala be. ¹⁸ Wo man xa yexee fanyi je keren daaxi solofere sa na taami fari, tuura lanma keren, nun yexee kontonyi firin naxee bama serexe gan daaxie ra. Wo man xa sansi xori luxutaxi nun minse serexe sa nee fari. Nee gan xiri nafa n tan Alatala ma. ¹⁹ Wo man xa sikote keren ba yunubi xafari serexe ra, a nun yexee firin je keren daaxi, naxee findima xanunteya serexe ra. ²⁰ Serexedube na birin masenma n tan Alatala nan be, na taami singee, nun na yexee firinye. E birin fima n tan Alatala nan ma, e fa lu serexedube be. ²¹ Na loxo wo xa malanyi seniye nxi raba. Wo naxa wali yo raba na loxo. Seriyen na a ra wo tonsa be yire birin abadan. ²² Wo na xe xaba wo xonyi, wo naxa a tuxuie xaba. Baloe naxan birama boxi ma, wo xa na lu naa setaree be, a nun mixie be naxee kelixi pamane gbete ma. Alatala nan n na, wo Marigi Ala.»

²³ Alatala naxa a masen Annabi Munsa be, ²⁴ «A fala Isirayilakae be, kike solofere nde, xi singe, wo xa wo malabu na loxo, wo xa pama maxili sara xui ra, wo malanyi

seniyenxi raba. ²⁵ Wo naxa wali yo raba na lɔxɔɛ, wo xa sɛrɛxɛ gan daaxie ba n tan Alatala bɛ.»

²⁶ Alatala naxa a masen Annabi Munsa bɛ, ²⁷ «Kike solofere nde, xi fu nde xa findi Xunsare Lɔxɔɛ ra. Wo xa malanyi seniyenxi raba, wo xa sunyi suxu, wo xa sɛrɛxɛ gan daaxie ba n tan Alatala bɛ. ²⁸ Wo naxa wali yo raba na lɔxɔɛ, barima Xunsare Lɔxɔɛ na a ra, wo xun sarama wo Marigi Alatala ya i lɔxɔɛ naxɛ. ²⁹ Mixi naxan tondima sunyi suxude na lɔxɔɛ, na kanyi raminima nɛ a xa pama ya ma. ³⁰ Mixi naxan wali yo rabama na lɔxɔɛ, n a sɔntɔma nɛ a xa pama tagi. ³¹ Wo naxa wali yo raba. Seriyɛ na a ra wo bɔnsɔɛ birin bɛ yire birin, naxan mu kanama abadan. ³² Na findima malabui lɔxɔɛ nan na wo bɛ. Wo xa sunyi suxu fɔlɔfɛ na kike xi solomanaani lɔxɔɛ nunmare ra, han a xi fu lɔxɔɛ nunmare ra.»

³³ Alatala naxa a masen Annabi Munsa bɛ, ³⁴ «A fala Isirayilakae bɛ, kike solofere nde xi fu nun suuli nde, Bage Ti Sali fɔlɔma, a bu xi solofere n tan Alatala xa binyɛ bun ma. ³⁵ Sali xi singe malanyi seniyenxi rabama nɛ. Wo naxa wali yo raba na lɔxɔɛ. ³⁶ Wo xa sɛrɛxɛ gan daaxie ba n tan Alatala bɛ xi solofere bun ma. Xi solomasaxan nde wo xa malanyi seniyenxi raba. Wo xa sɛrɛxɛ gan daaxie ba n tan Alatala bɛ. Sali xungbe na a ra, wo naxa wali yo raba.»

³⁷ «N tan Alatala xa sali lɔxɔɛ xungbee nan na ki wo bɛ. Wo xa sɛrɛxɛ gan daaxie, sansi xɔri sɛrɛxɛɛ, nun minse sɛrɛxɛɛ ba a ba temui. ³⁸ Wo xa n tan Alatala xa malabui lɔxɔɛɛ rabatu, wo xa xanunteya sɛrɛxɛɛ, wo xa laayidi sɛrɛxɛɛ, a nun wo xa janige sɛrɛxɛɛ wo naxɛɛ fima n ma, wo xa e rakamali.»

³⁹ «Kike solofere nde xi fu nun suuli nde, wo gɛ xanbi wo xa xɛɛ bogiseɛ malande, wo xa sali raba n tan Alatala bɛ xi solofere bun ma. Sali xi singe nun a xi solomasaxan nde findixi malabui lɔxɔɛɛ nan na. ⁴⁰ Sali xi singe, wo xa bogise fanyie ba sansi bilie kɔn na, tugi fenseɛ, nun wuri tofanyi jingie. Wo xa sɛɛwa wo Marigi Alatala ya i xi solofere bun ma. ⁴¹ Wo xa yi sali raba Alatala bɛ jɛ yo jɛ xi solofere bun ma. Seriyɛ na a ra wo bɔnsɔɛ birin bɛ naxan mu kanama abadan. Wo xa na sali raba kike solofere nde kui. ⁴² Wo xa xi bageɛ kui na xi solofere bun ma. Isirayilakae birin xa xi bageɛ kui, ⁴³ alako wo bɔnsɔɛɛ xa a kolon a n a niyaxi nɛ wo benbae xa xi bageɛ kui n e ramini Misira bɔxi ra temui naxɛ. Alatala nan n na, wo Marigi Ala.»

⁴⁴ Annabi Munsa xa maseniyi nan na ki, a naxan masen Isirayilakae bɛ Alatala xa salie xa fɛ ra.

Yire seniyenxi lanpui

¹ Alatala naxa a masen Annabi Munsa be, ² «Isirayilakae yamari, e xa fa oliwi ture fanyi ra i xon, alako lanpuie xa dexe temui birin. ³ Haruna xa a jengi sa lanpuie xon, naxee na horomolingira kui, yire seniyenxi seeti ma. Saate kankira na na yire seniyenxi fisamante nan kui, dugi gbakuxi a sode de ra. A xa a niya lanpuie xa nu dexe n tan Alatala ya i temui birin, kelifa nunmare ra han geesege. Seriyen na a ra wo bonsode be abadan. ⁴ Haruna xa a jengi sa lanpuie xon naxee dodoxi lanpui dodo se xema daaxie fari n tan Alatala ya i.»

⁵ «Wo xa taami fu nun firin yailan sansi xori luxutaxi fanyi ra, taami keren, sansi xori dinxi konbo ya keren. ⁶ Wo xa e sa safe firin, senni na seeti keren, senni na seeti boore, teebili fari n tan Alatala ya i. ⁷ Wo xa surayi fanyi sa taami safee seeti ma, naxan fama gande taami joxoe ra n tan Alatala be. ⁸ Taami xa sa teebili fari malabui loxo birin. Seriyen na a ra Isirayilakae be abadan. ⁹ Haruna nun a xa die xa na taamie don yire seniyenxi, barima serexe seniyenxi na a ra, naxee fixi Alatala ma a gan daaxi ra. Seriyen na a ra naxan mu kanama abadan.»

Ala xa seriyen matandie

¹⁰ Loxoe nde mixi nde naxa so Isirayilakae ya ma. A nga findi Isirayilaka nan na, konon a baba naxa findi Misiraka ra. Gere naxa bira a i na mixi nun Isirayilaka nde tagi. ¹¹ Na kui, na Isirayila gine xa di naxa Alatala xili bexu, a a konbi. E naxa a xanin Annabi Munsa xon na fe ma. Na mixi nga xili ne Selomiti, Dibiri xa di gine, Dana bonsode. ¹² E naxa a suxu a fanyi ra han Alatala yati naxa a xa fe ya iba e be.

¹³ Alatala naxa a masen Annabi Munsa be, ¹⁴ «Nama xa yi konbiti xanin jama yonkinde fari ma. Naxee na konbi mexi, nee xa e belaxee sa a xunyi, jama birin fa a magono geme ra han a faha. ¹⁵ I xa a fala Isirayilakae be, mixi yo naxan n tan Ala konbima, na yunubi kote luma a xun ma. ¹⁶ Naxan na n tan Alatala xili bexu, jama birin xa a magono geme ra han a xa faha. Xa a findi xone ra, xa a findi beka ra, a xa faha barima a bara n tan Alatala bexu.»

¹⁷ «Mixi naxan na adamadi faha, a fan xa faha. ¹⁸ Mixi naxan na mixi nde xa xuruse faha, a xa a joxoe so a yi. Nii joxoe xa fi nii ra. ¹⁹ Mixi naxan na a boore maxono, a fan xa maxono na ki. ²⁰ Maxone joxoe maxone nan na. Ya joxoe ya nan na,

jinyi joxɔɛ na jinyi nan na. A xa maxɔɔ alo a a rabaxi a boore ra ki naxɛ. ²¹ Mixi naxan na mixi xa xuruse faxa, a xa a joxɔɛ fi, kɔɔ mixi naxan na adamadi faxa, na kanyi fan xa faxa. ²² Seriyɛ keren na a ra wo birin bɛ, xɔɔɛ nun Isirayilakae. Alatala nan n na, wo Marigi Ala.»

²³ Annabi Munsa to gɛ na masenyi tide Isirayilakae bɛ, pama naxa na konbiti xanin pama yonkinde fari ma, e a magɔɔ gɛmɛ ra han a faxa. Na kui e naxa Alatala xa yaamari suxu alo Annabi Munsa a masenxi e bɛ ki naxɛ.

25

Malabui jɛ

¹ Alatala naxa a masen Annabi Munsa bɛ Sinayi geya fari, ² «A fala Isirayilakae bɛ, wo na so bɔxi kui n naxan fima wo ma, wo xa a lu bɔxi xa malabu n tan Alatala xa binyɛ bun ma. ³ Wo xa xɛ wali suxu, wo xa mɛɛni weni bilie ma, wo xa e bogie ba. Wo xa na birin naba jɛ senni bun ma, ⁴ kɔɔ jɛ solofere nde wo xa a lu bɔxi xa a malabu n tan Alatala xa binyɛ bun ma. Wo naxa xɛ wali raba, wo naxa fefe raba weni bilie ra na jɛ kui. ⁵ Sansi bogi naxee bulama e yetɛ ma, wo naxa e xaba. Weni bogie naxee bogima e yetɛ ma, wo xa e lu naa barima malabui jɛ na a ra bɔxi bɛ. ⁶ Bɔxi naxan naminima na malabui jɛ kui, wo birin nɔma na donde, wo tan, wo xa konyie, wo xa walikɛɛ, wo xa xɔɔɛ, ⁷ wo xa xuruseɛ, a nun burunyi sube naxee na bɔxi kui. Bɔxi naxan namini a yetɛ ra na jɛ ra, na nan findima wo baloe ra.»

Xɔɔɛɛ Jɛ

⁸ «Wo xa malabui jɛ solofere kɔɔti, jɛ tongo naani nun solomanaani, jɛ solofere dɔɔɔ solofere. ⁹ A kike solofere xi fu nde, wo xa saraɛ fɛ pama bɛ bɔxi birin kui, a findima Xunsare Lɔɔɔɛ nan na. ¹⁰ Na jɛ tongo suuli nde xa findi xɔɔɛɛ jɛ ra bɔxi mixi birin bɛ. Konyi birin xa xɔɔɛɛ sɔɔ, kankan xa gbilen a xɔɔni a xabile ya ma. ¹¹ Na jɛ tongo suuli nde findima Xɔɔɛɛ Jɛ nan na wo bɛ. Wo naxa sansi xɔɔɛ si, wo naxa sansi bogie nun weni bogie ba naxee bulama e yetɛ ma, ¹² Xɔɔɛɛ Jɛ nan na ra, waxati seniyenxi na a ra wo bɛ. Bɔxi daxamui xa findi wo xa baloe ra.»

¹³ «Na Xɔɔɛɛ Jɛ kui, birin xa gbilen e xa bɔxi ma. ¹⁴ Xa wo bɔxi matima wo ngaxakerenyi ma, xa na mu a ra wo bara nde sara wo ngaxakerenyi ma, wo naxa wo boore tɔɔɔ na kui. ¹⁵ Wo xa na sara sare tinxinxi ra, naxan jɛ kɔɔtima kelifɛ Xɔɔɛɛ Jɛ waxati. Wo ngaxakerenyi xa na mati wo ma seriyɛ ki ma. A xa xɛ xaba jɛ kɔɔti naxee

luxi beenu Xoreya Ne xa a li. ¹⁶ Xa je wuyaxi luxi, a sare xa mate na ki. Xa je wuyaxi mu luxi, a sare xa magoro. Wo xa a mato xe xabama sanmaya yeri beenu Xoreya Ne xa a li. ¹⁷ Wo naxa wo boore tɔɔɔ na kui. Wo xa gaaxu wo Marigi Ala ya ra. Alatala nan n na, wo Marigi Ala.»

¹⁸ «Wo xa n ma seriye suxu, wo xa n ma yaamarie rabatu, alako wo xa lu yi boxi ma bɔɔsa kui. ¹⁹ Boxi daxamui fama wo wasade, wo man sabatima bɔɔsa kui. ²⁰ Xa wo sa maxorinyi ti yi ki, «Xa won mu sese sima je solofere nde kui, xa won mu sansi xabama na temui, won baloma munse ra fa?» ²¹ N tan nan baraka ragoroma wo ma je senni nde kui, naxan findima baloe ra wo be je saxan bun ma. ²² Wo xa sansi xori si je solomasaxan nde kui, kɔɔ wo donse ragataxi nan donma han je solomanaani nde. Donse naxan nagataxi, na wo ralima ne han baloe neene sa minima temui naxe.»

²³ «Wo naxa boxi mati a xa lu wo boore yi ra abadan, barima n tan nan gbe boxi ra. Wo luxi ne alo xɔɔe naxee yigiyaxi n xɔɔyi. ²⁴ Seriye ki ma, wo xa tin yi boxi birin xun xa sara. ²⁵ Xa wo ngaxakerenyi nde a xa boxi mati a xa setarepa ma, a bariboore nde xa na boxi matixi xun sara. ²⁶ Xa a bariboore mu na naxan noma na boxi xun sarade, kɔɔ a tan naxa sa na xunsare feere soto a yete ra, ²⁷ a xa boxi sare konti seriye ki ma, kelifa a sara temui, a fa na jɔxɔe ragbilen a sara mixi ma, alako a xa gbilen a xa boxi masoto ra. ²⁸ Kɔɔ xa a mu na xunsare feere soto, na boxi xa lu a sara mixi yi ra han Xoreya Ne ra. Na temui boxi kanyi man xa gbilen a xa boxi masoto ra.»

²⁹ «Xa mixi nde sa a xa banxi mati naxan na taa kui tete rabilinxi naxan na, a noma na banxi xun sarade je keren bun ma. ³⁰ Xa na banxi xun mu sara na je kui, a luma ne a sara mixi nun a bɔɔsɔe yi ra abadan. Hali Xoreya Ne kui a sara mixi mu kelima naa. ³¹ Kɔɔ banxi naxee tixi taa xunxurie kui, naxee mu rabilinxi tete ra, nee luma alo boxi. E noma xun sarade. Naxan na mooli sarama, a lanma a xa mini na banxi Xoreya Ne ra.»

³² «Lewikae tan noma e xa banxie xun sarade e xa taae kui temui birin. ³³ Naxan bara Lewika nde xa banxi sara, a minima ne na kui Xoreya Ne temui, barima banxi naxee na Lewikae xa taae kui, nee findixi Lewikae nan gbe ra Isirayila pama tagi. ³⁴ Xe naxee na Lewikae xa taae rabilinyi, nee mu noma matide, barima Lewikae nan gbe e ra abadan.»

Doni seriye

³⁵ «Xa wo ngaxakerenyi nde findi setare ra, feere mu na a yi ra a baloma naxan na, a lanma wo xa a mali alo xɔɲɛ, a xa lu wo fe ma. ³⁶ Wo naxa riba sa a xa doni xun ma. Wo xa gaaxu Wo Marigi Ala ya ra. Wo xa wo ngaxakerenyi yigiya. ³⁷ Wo naxa riba sa a xa doni xun ma, wo naxa riba sa a xa donse sare xun ma. ³⁸ Alatala nan n na, wo Marigi Ala, naxan wo raminixi Misira boxi kui, n xa Kanaan boxi fi wo ma, n xa findi wo Marigi Ala ra.»

Mixi xun sara seriye

³⁹ «Xa wo ngaxakerenyi nde a yete mati wo ma a xa setarepa ma, wo naxa konyi wali dɔxɔ a ma. ⁴⁰ A xa lu alo wo xa walike, xa na mu a ra wo xa xɔɲɛ han Xɔreya Ƴɛ waxati. ⁴¹ Na temui, a tan nun a xa die xa xɔreya, e xa gbilen e xabile ma, e benbae xa boxi ma, ⁴² barima n ma walikee nan Isirayilakae ra, n naxee raminixi Misira boxi ra. A mu lanma e xa mati konyiya ra. ⁴³ Wo naxa e yamari a jaaxi ra, wo xa gaaxu wo Marigi Ala ya ra. ⁴⁴ Xa wo wama konyie xɔn, wo xa e sara si gbete tagi, naxee na wo rabilinyi. E tan nan xa findi wo xa konyie ra. ⁴⁵ Wo man noma konyie sarade si gbete xa mixie ya ma naxee dɔxɔxi wo tagi, a nun e xabilee mixi naxee barixi wo xa boxi kui. Nee noma findide wo xa konyie ra. ⁴⁶ Wo noma e lude wo xa die yi ra ke ra. E noma lude konyiya kui abadan, kɔnɔ wo ngaxakerenyi Isirayilakae mu noma lude e ngaxakerenyi xa yaamari xɔɔxɔɛ bun ma.»

⁴⁷ «Xa wo ngaxakerenyi setare nde a yete mati xɔɲɛ bannaxi ma wo xa boxi kui, xa na mu a ra na xɔɲɛ xabile mixi nde ma, ⁴⁸ wo ngaxakerenyi bariboore nde noma a xun sarade. ⁴⁹ A sɔxɔ, xa na mu a ra a sɔxɔ xa di, xa na mu a ra a bariboore nde gbete, noma a xun sarade. Xa a fan feere sɔtɔ, a noma a yete xun sarade. ⁵⁰ A xa na xunsare konti seriye ki ma, kelifa a sara Ƴɛ ma, han Xɔreya Ƴɛ ra. A xa na ɲɔxɔɛ ragbilen a kanyi ma, a xa lu alo wali sare. ⁵¹ Xa Ƴɛ wuyaxi luxi, a xunsare xa gbo na ki a kanyi mabiri. ⁵² Xa Ƴɛ wuyaxi mu luxi beenu Xɔreya Ƴɛ xa a li, a xunsare xa lan na Ƴɛ xasabi ma. ⁵³ A noma lude alo walike a kanyi xɔnyi, kɔnɔ a mu lanma a kanyi xa a yamari a jaaxi ra. ⁵⁴ Xa a mu noma a yete xun sarade yi feere mooli yo ra, a tan nun a xa die xa lu e kanyi yi ra han Xɔreya Ƴɛ ra, ⁵⁵ barima n tan nan ma walikee na Isirayilakae ra, n naxee raminixi Misira boxi ra. Alatala nan n na, wo Marigi Ala.»

¹ «Wo naxa kuye yo yailan, wo naxa ala nde rafala, wo naxa geme batu daaxi dɔxɔ, wo naxa geme masolixi batu, barima Alatala nan n na, wo Marigi Ala. ² Wo xa n ma malabui lɔxɔee rabatu, wo xa n ma yire seniyenxi binya. Alatala nan n na.»

³ «Xa wo n ma seriye suxu, xa wo n ma yaamarie rabatu, ⁴ n tune ragoroma ne wo be a waxati, bɔxi daxamui raminima ne, sansie bogima ne xe ma. ⁵ Sansi bɔnbɔ temui buma ne han weni bogi ba temui. Weni bogi ba temui fan buma ne han sansi si temui. Wo wasama ne baloe ra, wo sabati wo xa bɔxi ma bɔjesa kui. ⁶ N hinnema wo ra alako wo xa xi bɔjesa kui, alako burunyi subee nun geresoe naxa wo tɔɔɔ wo xɔnyi. ⁷ Wo nɔma ne wo yaxuie ra santidegema ra. ⁸ Wo xa sɔɔri suuli fama ne wo yaxui mixi keme keride. Wo xa sɔɔri keme fama wo yaxui mixi wulu fu keride. Wo fama nɔde wo yaxuie ra gere kui. ⁹ Won birin na a ra. N di wuyaxi fima ne wo ma, n wo rawuya. N nan n ma saate rakamalima ne wo be. ¹⁰ Wo yaala maale donma ne han maale xaba temui. Wo a fori bama ne a sasee kui a xa gboe ma, alako wo xa nɔ maale neene ragatade. ¹¹ N luma ne wo seeti ma, n mu meema wo ra. ¹² N jɛrema ne wo ya ma. Wo Marigi Ala nan n na, wo fan bara findi n ma jama ra. ¹³ Alatala nan n na, wo Marigi Ala, naxan wo ramini Misira bɔxi ra alako wo naxa lu e yi ra. N bara konyiya kote ba wo xun ma, alako wo xa jɛre xunnakeli kui.»

¹⁴ «Kɔnɔ, xa wo mu n xui rame, xa wo mu n ma yaamarie birin nabatu, ¹⁵ xa wo mu n ma seriye suxu, xa wo mu bira n waxɔnfe fɔxɔ ra, xa wo n ma saate kana, ¹⁶ n yi nan nabama wo ra: N yihadi ragoroma ne wo ma, n wo rafurama ne fure jaaxi ra naxan wo yae kanama, naxan wo bɔje tɔɔɔma. Wo sansi xɔrie sima ne fufafu, barima wo yaxuie na birin donma ne. ¹⁷ N gbilenma ne wo fɔxɔ ra. Wo yaxuie nɔma ne wo ra, wo xɔnnantee wo yamarima ne. Wo luma gaaxui nan kui, wo nu wo gi hali mixi mu na wo fɔxɔ ra.»

¹⁸ «Kɔnɔ na birin kui, wo mu fama n xui ramede. N wo jaxankatama han sanmaya solofere wo xa yunubie xa fe ra. ¹⁹ N wo xa yete igboja kanama ne. N koore balanma ne wo ya ra han wo xa bɔxi xɔɔxɔ alɔ wure gbeeli. ²⁰ Wo senbe jɔnma ne fufafu. Wo xa bɔxi tondima ne daxamui raminide, wo xa sansie mu bogima sɔnɔn.»

²¹ «Xa wo lu n matandi ra, xa wo mu n xui rame, n wo jaxankatama han sanmaya solofere wo xa yunubie xa fe ra. ²² N burunyi subee rafama ne wo xili ma. E wo xa die faxama ne, e wo xa xurusee ibɔɔ, e wo sɔntɔ han mixi jɔn kirae xɔn ma.»

²³ «Na birin naba xanbi wo ra, xa wo mu tin n ma seriye ra, xa wo lu n matandi ra,

²⁴ n fe xərəxəe rafama ne wo ma, n wo jaxankata han sanmaya solofere wo xa yunubie xa fe ra. ²⁵ N gere rakelima ne wo ma n ma saate kanaxi xa fe ra. Wo na wo nɔxun wo xa taa makantaxie kui, n wo rafurama ne fure jaaxi ra, wo fa lu wo yaxuie sagoe. ²⁶ N kaame radinma wo ma temui naxe, gine fu taami ganma ne taami ganse keren kui. E na itaxun a xunxuri ra, e a xanin wo xɔn ma wo a don, kɔnɔ a mu wo wasama.»

²⁷ «Na birin naba xanbi wo ra, xa wo mu wo tuli mati n na, xa wo tondi n waxɔnfe suxude, ²⁸ n fe xərəxəe rafama ne wo ma, n wo jaxankata han sanmaya solofere wo xa yunubie xa fe ra. ²⁹ Wo fama wo xa die sube yati donde. ³⁰ N wo xa kuye batudee kanama ne naxee na geyae fari. N wo xa gemee rabirama ne, wo naxee batuma. N furee malanma ne wo xa kuyee fari. N wo rabepinma ne, ³¹ n wo xa taae findi gbengberenyi ra, n wo xa batudee kana, n tondi wo xa serexee suxude sɔnɔn. ³² N na ge wo xa bɔxi kanade, wo yaxuie yati fama kaabade na xa fe ra. ³³ N wo rayensenma ne jamane gbete ma, n wo jaxankatama ne santidegema ra. Wo xa bɔxi kanama ne, mixi yo mu luma wo xa taae kui.»

³⁴ «Na waxati bun ma wo xa bɔxi malabuma ne. Wo na wo yaxuie yire temui naxe, wo xa bɔxi fanma ne malabui saabui ra. ³⁵ Wo xa bɔxi malabui sɔtɔma na waxati nan kui a mu naxan sɔtɔ wo nu na menni temui naxe. ³⁶ Naxee mu faxama na geree kui, nee luma ne gaaxui kui e yaxuie yire, hali wuri burexe nan din e ra, fo e e gi. E e gima ne, e bira hali santidegema kanyi yo mu na e fɔxɔ ra. ³⁷ E birama ne e boore fari, alɔ santidegema kanyi nan e fɔxɔ ra, a fa li mixi yo mu na e fɔxɔ ra. Wo mu nɔma tide wo yaxuie ya ra. ³⁸ Wo sɔntɔma ne si gbete tagi, wo yaxuie nɔma ne wo ra. ³⁹ Naxee mu faxama geree kui wo ya ma, nee fama ne faxade e yaxuie xa bɔxi ma e xa yunubie nun e benbae xa yunubie xa fe ra.»

⁴⁰ «E fama e xa yunubie nun e benbae xa yunubie masende n be, a nun e naxan nabaxi n na matandi kui. ⁴¹ N fan e tɔɔrɔma ne e yaxuie xa bɔxi kui, alako mixi naxee e yete fixi n ma, e xa magoro. E xa e xa yunubie sare fi. ⁴² Na temui n nan n jɔxɔ sama ne n ma saate xɔn ma naxan na n tan, nun Yaxuba, Isiyaga, nun Iburahima tagi. N mu neemuma na bɔxi ma. ⁴³ Bɔxi fama ne malabude na temui, barima Isirayilakae bara siga pon e xa yunubi sare fide. E bara n ma seriye bepin, e bara yo n ma yaamarie ma.»

⁴⁴ «Kɔnɔ, n na e kerɔ sigafe ra e yaxuie yire temui naxe, n mu e rabepinma han e xa sɔntɔ. N mu n ma saate kanama e tan ma fe ra, barima Alatala nan n na, e Marigi Ala.

⁴⁵ N nan n jɔxɔ sama ne n ma saate singe xɔn ma, n e ramini Misira bɔxi ra sie ya xori

temui naxe, alako n xa findi e Marigi Ala ra. Alatala nan n na.»

⁴⁶ Alatala xa seriyɛ, a xa yaamarie, nun a xa masenyie nan na ki Alatala naxee masenxi Isirayilakae be Annabi Munsa saabui ra Sinayi geya fari.

27

Mixi naxee e yetɛ fixi Ala ma

¹ Alatala naxa a masen Annabi Munsa be, ² «A fala Isirayilakae be, xa mixi nde laayidi tongo, a xa mixi nde fi n tan Alatala ma, a noma a xun sarade yi kɔbiri xasabi nan na. ³ Xa xeme na a ra naxan xa simaya kelima je mɔxɔɔnɛn han je tongo senni, a xun sarama gbeti kole tongo suuli nan na naxan maniyama yire seniyenxi maniyase ra. ⁴ Xa gine na a ra, a xun sarama gbeti kole tongo saxan nun a tagi nan na. ⁵ Xa di xeme na a ra naxan xa simaya kelima je suuli han je mɔxɔɔnɛn, a xun sarama gbeti kilo mɔxɔɔnɛn nan na. Xa gine dimedi na a ra, a xun sarama gbeti kole fu nan na. ⁶ Xa di xeme na a ra naxan mu je suuli sɔtɔxi sinden, a xun sarama gbeti kole suuli nan na. Xa di gine na a ra, a xun sarama gbeti kole saxan nan na. ⁷ Xa xemoxi na a ra naxan xa simaya dangima je tongo senni ra, a xun sarama gbeti kole fu nun suuli nan na. Xa jɛlexefori na a ra, a xun sarama gbeti kole fu nan na. ⁸ Xa setare bara na laayidi tongo, naxan mu noma na xunsare xasabi fide, a lan a xa a yetɛ masen serɛxɛdube be naxan fama xunsare xasabi falade a be a noma naxan na.»

⁹ «Xa mixi nde laayidi tongo xuruse nde fife ra, naxan noma bade serɛxɛ ra n tan Alatala be, na xuruse xa fi n tan Alatala ma. A bara seniyen. ¹⁰ Xuruse gbete mu fima a masare ra, a fan ba, a mu fan ba. Xa wo na rabama, e firinyi bara findi se seniyenxi ra. ¹¹ Xa sube raharamuxi na a ra, naxan mu bama serɛxɛ ra n tan Alatala be, a xa xanin serɛxɛdube xɔn. ¹² Serɛxɛdube xa xunsare nde fala sube kepa ma. Na xa findi a sare ra. ¹³ Xa a kanyi wama na sube xun sarafe, a xa na sare fi, a man xa kɔbiri nde sa na fari. Na findima kɔbiri naxan na, a na se sare nan itaxunma dɔxɔ suuli ra, a fa dɔxɔ keren ba a ra, a na fi xunsare ra.»

¹⁴ «Xa mixi nde a xa banxi fi n tan Alatala ma, serɛxɛdube xa na sare fala banxi kepa ma. Na xa findi a sare ra. ¹⁵ Xa a kanyi wama a xun sarafe, a xa na sare fi, a man xa kɔbiri nde sa na fari. Na findima kɔbiri naxan na, a na banxi sare nan itaxunma dɔxɔ suuli ra, a fa dɔxɔ keren ba a ra, a na fi xunsare ra. Na temui banxi xa gbilen a kanyi ma.»

¹⁶ «Xa mixi nde a xa xε fi n tan Alatala ma, a sare fatanma sansi xōri xasabi nan na naxan nōma garansande naa. Gbeti kole tongo suuli xa fi fundenyi maniye busali naani xasabi ra. ¹⁷ Xa a a xa xε fi Xōreya Jε nan kui, a sare mu masarama. ¹⁸ Xa a a xa xε fi Xōreya Jε dangi xanbi ne, serexedube xa jee konti naxee luxi beenu Xōreya Jε gbete xa fa. A xa nde ba xε sare ra na seriye kui. ¹⁹ Xa xε kanyi wama a xa xε xun sarafe, a xa na sare fi, a man xa kōbiri nde sa na fari. Na findima kōbiri naxan na, a na xε sare nan itaxunma dōxō suuli ra, a fa dōxō keren ba a ra, a na fi xunsare ra. Na temui xε xa lu a yi ra. ²⁰ Xa a mu xε xun sara, a fa a mati mixi gbete ma, a mu nōma a xun sarade sōnōn. ²¹ Xōreya Jε na a li, na xε kanyi neene xa keli na bōxi ma. Bōxi bara seniye, a bara lu alō bōxi naxan natōnxi. A bara findi Alatala gbe ra, serexedube xa na rawali. ²² Xa mixi bara xε saraxi fi Alatala ma, naxan mu na a xabile kε ya ma, ²³ serexedube xa a sare fala a seriye ki ma. A na kolonma jε xasabi nan ma naxee luxi beenu Xōreya Jε xa a li. Na kanyi xa a sare fi na lōxōe yati, barima a seniye n tan Alatala be. ²⁴ Xōreya Jε na a li, na xε gbilenma na xε kanyi singe nan ma, boore a sara naxan ma. ²⁵ Na saree birin maniyama yire seniye nxi xa se maniya ki nan ma. A kole keren lanxi garamu fu nan ma.»

²⁶ «Mixi yo mu nōma a xa xuruse di singe fide n tan Alatala ma, barima a jan findixi n tan Alatala gbe nan na. Xuruse xungbe nun a lanma di singe birin findixi n tan nan gbe ra. ²⁷ Mixi nōma sube raharamuxi xa di singe xun sarade. Na mixi xa a sare fi, a man xa kōbiri nde sa na fari. Na findima kōbiri naxan na, a na sube sare nan itaxunma dōxō suuli ra, a fa dōxō keren ba a ra, a na fi a xunsare ra. Xa a kanyi mu a xun sarama, a xa a mati a sare ra.»

²⁸ «Kōnō se ndee na mixi naxee fima n tan Alatala ma a bōje birin na e findi n gbe ra, adama mu nōma nee xun sarade sōnōn. Nee bara seniye, nee bara findi n tan Alatala gbansan gbe ra. Nee nōma findide mixi, xuruse, xε, xa na mu a ra se gbete ra. ²⁹ Mixi se naxee fima n tan Alatala ma na mōoli ra, e xun mu nōma sarade, fo e xa faxa ne.»

³⁰ «Bōxi farile birin findima n tan Alatala nan gbe ra, sansi xōri naxan naminima nun wuri bili naxan bogima. Na farile birin fima n tan Alatala nan ma. ³¹ Xa mixi nde wama a xa farile xun sarafe, a xa a sare fi, a man xa kōbiri nde sa na fari. Na findima kōbiri naxan na, a na se sare nan itaxunma dōxō suuli ra, a fa dōxō keren ba a ra, a na fi a xunsare ra. ³² Xuruse farile birin findima n tan Alatala nan gbe ra, xuruse xungbe nun a lanma, xuruse de madonyi naxan birin kontima. Na farile birin fima n tan Alatala nan

ma. ³³ Xurusee mu matoma xa a fan, xa a mu fan. Xuruse mu noma masarade xuruse gbete ra, xa na mu a ra na firinyi birin seniyenma ne, e findi n tan Alatala gbe ra, e sese mu noma xun sarade sonon.»

³⁴ Alatala xa yaamarie nan na ki, a naxee so Annabi Munsa yi ra Sinayi geya fari Isirayilakae be.
